

妙法華經合論卷第二

C40
4514
(12)

C40-4514

了翁上座請大藏及有
家書置之武州紫雲山
我微笑塔院庫府中未
為學者不敢許出院內
當山二世鐵牛機謹誌



B 64853

妙法蓮華經合論卷第二

經 姚秦三藏法師鳩摩羅什 譯

論 宋六只覺圓明禪師惠洪 造

附論 宋三無盡居士張商英 撰

妙法蓮華經譬喻品第二

爾時舍利弗踊躍歡喜即起合掌瞻仰尊顏而白佛
言今從世尊聞此法日心懷踊躍得未曾有所以者
何我昔從佛聞如是公見諸菩薩受記作佛而我等
不預斯事甚自感傷入於如來無量知見世尊我常
獨處山林樹下若坐若行每作是念我等同入法性
云何如來以小乘法而見濟度是我等若世尊也

所以者何若我等待說所因成就阿耨多羅三藐三
菩提者必以大乘而得度脫然我等不解方便隨宜
所說初聞佛法遇便信受思惟取證世尊我從昔來
終日竟夜每自尅責而今從佛聞所未聞未曾有法
斷諸疑悔身意泰然快得安隱今日乃知真是佛子
從佛口生從法化生得佛法分爾時舍利弗欲重宣
此義而說偈言

我聞是法音得所未曾有心懷大歡喜疑網皆已除
昔來蒙佛教不失於大乘佛音甚希有能除衆生惱
我已得漏盡聞亦除憂惱我處於山谷或在林樹下
若坐若經行常思惟是事嗚呼深自責云何而自欺

我等亦佛子同入無漏法不能於未來演說無上道
金色三十二力能解脫同一法中而不得此事
八十種妙好十八不共法如是等功德而我皆已失
我獨經行時見佛在大衆名聞滿十方廣饒益衆生
自惟失此利我爲自欺誑我常於日夜每思惟是事
欲以問世尊爲失爲不失我常見世尊稱讚諸菩薩
以是於日夜籌量如是事今聞佛音聲隨宜而說法
無漏難思議令衆至道場

論曰舍利弗知同入法性而不知何以謂之法性
如人知室所藏者爲寶聚不知其爲黃金珠璧歟
水晶象犀歟夫法性者無性之性也以無性故循

三乘之性所起而為聲聞為辟支佛為菩薩非實
有三乘決定之性註其無決定性故無取無證圓
覺經曰圓覺自性非性性有循諸性起無取無證
非性性有則以非二乘故循諸性起則以無性故
舍利弗謂佛以小乘見度念之不忘者不知無性
之性隨為三乘則遵奉佛所以濟度之法思惟取
證而已如窶人之子知華屋玉食非我當享惟以
禪取求脫飢寒今知免矣則其踊躍固其所也知
佛種種因緣言辭譬喻者方便也因其方便以開
悟故言從佛口生知無性之性所以為三乘故言
從法化生知本來成註故言得佛法分如室所藏

之寶今發露矣珍異現前由我受用不復起父想
子想亦不起用慈也金剛般若經曰譬如人身長
大而無著菩薩釋之曰菩薩證道時得二種智慧
謂攝種性智及平等智如人身長者以方生如來
家決定紹佛種故名攝種性智如人身大者已於
一切智智悉成就到平等際有大勢力故名平等
智言譬如人身長大者兼此二義舍利弗方生如
來家者也但得攝種性智故言真是佛子瑜珈論
曰謂是大師子佛腹所生佛口所生佛法所生佛
法所化得佛等分等分則攝種性智也

我本著邪見為諸梵志師世尊知我心叛邪說涅槃

我悉除邪見於空法得證爾時心自謂得至於滅度而今乃自覺非是實滅度

論曰一切賢聖證四種涅槃而佛秘密藏大涅槃不預也何謂四種曰一者自性清淨涅槃謂雖有染心性常明潔具足一切性功德故一切有情平等共有與一切法不一不異離一切相一切分別尋思路絕名言道斷惟真聖者自內所證故二者有餘依涅槃謂真如出煩惱障雖有微苦所依未滅而障未寂故三者無餘依涅槃謂真如出生死苦煩惱既盡餘依亦滅衆苦未寂故四者無住處涅槃謂真如出所知障大悲般若常所輔翼所以

不住生死涅槃利樂有情窮未來際用而常寂故至如佛秘密藏大般涅槃則如伊字三點並則不成伊縱亦不成伊如摩醯首羅面上三目乃得成伊三點若別亦不得成我亦如是解脫之法亦非涅槃如來之身亦非涅槃摩訶般若亦非涅槃三法各異亦非涅槃我今安住如是三法爲衆生故名入涅槃二乘所證之涅槃則異於是五種者矣初則諦觀以求親證以心麤故不見正智及生空真如乃見惑業後苦不生心便變作涅槃想解圓覺經曰但諸聲聞所圓境界身心語言皆悉斷滅終不能至彼之親證所現涅槃又曰有妄業故妄

見流轉厭流轉者妄見涅槃涅槃而言所證又言
妄現舍利弗言我於空法得證乃至如今自覺非
實滅度蓋因而後返者也

若得作佛時具三十二相天人夜叉衆龍神等恭敬
是時乃可謂未盡滅無餘佛於大衆中說我當作佛
聞如是法音疑悔悉已除初聞佛所說心中大驚疑
將非魔作佛惱亂我心耶佛以種種緣譬喻巧言說
其心安如海我聞疑網斷佛說過去世無量滅度佛
安住方便中亦皆說是法現在未來佛其數無有量
亦以諸方便演說如是法如今者世尊從生及出家
得道轉法輪亦以方便說世尊說實道波旬無此事

以是我定知非是魔作佛我墮疑網故謂是魔所爲
聞佛柔軟音深遠甚微妙演暢清淨法我心大歡喜
疑悔永已盡安住實智中我定當作佛爲天人所敬
轉無上法輪教化諸菩薩

論曰舍利弗出於小果驟聞大法刹那之間便起
見惑至以佛爲魔緣差之失有至是者然魔何所
從來哉若從外來耶則佛言三界惟心此義不成
何以故以心猶有外故若從內出耶則佛言心徧
十方此義不成何以故以心有容受魔地故作是
觀時魔卽是佛如善財童子至伊沙那聚落勝熱
婆羅門所見四面火聚猶如大山中有刀山高峻

法華論卷三
五十一
四〇・一
無極登彼山上投身入火時善財念曰將非是魔
魔所使耶乃至登刀山投火聚未至中間卽得菩
薩善住三昧纔觸火燄又得菩薩寂靜樂神通三
昧善財自言甚奇聖者如是刀山及大火聚我身
觸時安隱快樂時婆羅門告善財曰善男子我唯
得此菩薩無盡輪解脫如諸菩薩摩訶薩大功德
燄能燒一切衆生見惑令無有餘舍利弗以知見
力爲功德談者也

爾時佛告舍利弗吾今於天人沙門婆羅門等大衆
中說我昔曾於二萬億佛所爲無上道故常教化汝
汝亦長夜隨我受學我以方便引導汝故生我法中

舍利弗我昔教汝志願佛道汝今悉忘而便自謂已
得滅度我今還欲令汝憶念本願所行道故爲諸聲
聞說是大乘經名妙法蓮華教菩薩法佛所護念舍
利弗汝於未來世過無量無邊不可思議劫供養若
千千萬億佛奉持正法具足菩薩所行之道當得作
佛號曰華光如來應供正徧知明行足善逝世間解
無上士調御丈夫天人師佛世尊國名離垢其土平
正清淨嚴飾安隱豐樂天人熾盛瑠璃爲地有八交
道黃金爲繩以界其側其傍各有七寶行樹常有華
果華光如來亦以三乘教化衆生舍利弗彼佛出時
雖非惡世以本願故說三乘法其劫名大寶莊嚴何

法苑珠林卷之九
五十一
故名曰大寶莊嚴其國中以菩薩爲大寶故彼諸菩薩無量無邊不可思議算數譬喻所不能及非佛智力無能知者若欲行時寶華承足此諸菩薩非初發意皆久植德本於無量百千萬億佛所淨修梵行恒爲諸佛之所稱歎常修佛慧具大神通善知一切諸法之門質直無僞志念堅固如是菩薩充滿其國舍利弗華光佛壽十二小劫除爲王子未作佛時其國人民壽八小劫華光如來過十二小劫授堅滿菩薩阿耨多羅三藐三菩提記告諸比丘是堅滿菩薩次當作佛號曰華足安行多陀阿伽度阿羅訶三藐三佛隨其佛國土亦復如是舍利弗是華光佛滅度之

後正法住世三十二小劫像法住世亦三十二小劫
論曰衆生本來成佛而不自知由不自知故反從人覓所以供養承事善知識者以此然善知識者明告之曰汝固本來成佛則不信默不欲告則益疑不得已而言曰汝信根成熟當自開悟耳南越有蟹方病目聞其鄰漁於海濱得明珠問珠狀何若其鄰曰圓如彈光如月目病者疑不決更欲問有蟹叟笑曰汝目病若愈當自見珠也佛授大弟子舍利弗等成佛之記有以類此金剛般若經曰須菩提於意云何如來於然燈佛所有法得阿耨多羅三藐三菩提不也世尊如我解佛所說義

佛於然燈佛所無有法得阿耨多羅三藐三菩提
佛言如是如是須菩提實無有法如來得阿耨多
羅三藐三菩提若有法如來得阿耨多羅三藐三
菩提者然燈佛則不與我授記佛意若曰若然燈
佛當時有法可以付與我則便可得之矣以無法
相付與故但蒙授記而已又勝天王般若經曰菩
薩須真眈白勝天王言如來爲大王授記乎勝天
王答善思惟菩薩言善男子我授記如夢相又問
曰大王如此授記當得何法答曰不得衆生壽者
我人養育陰界入悉無所得若善若不善若染若
淨若有漏若無漏若世間出世間若有爲若無爲

若生死若涅槃悉無所得又問若無所得用授記
爲答曰善男子無所得故則得授記勝天王意若
曰若有所得則佛卽時付與我矣以無法相授故
但得授記而已推然燈佛之於釋迦文佛推釋迦
文佛之於勝天王授記之意洞然如此則知舍利
弗信根成熟則當自證知也經言汝於未來過無
量無邊不可思議劫者成佛不可以時期也供養
若干千萬億佛受持正法具足菩薩所行之道者
成佛不可以功計也以所經之劫所供養之佛皆
非思慮所及故也夫思不及之地豈關時數功用
哉經言國名離垢其土平正清淨嚴飾者一切智

智之境非心識無明之相也安隱豐樂天人熾盛
琉璃爲地者神通光明之藏非分別煩惱之區也
黃金爲繩以界其側八正道之所會也其旁各有
七寶行樹常有華果者七覺支之所生也佛號華
光劫名大寶莊嚴而其中菩薩皆爲大寶者則以
不思議功德莊嚴以爲主伴不思議無漏三昧以
爲眷屬故言彼諸菩薩無量無邊不可思議算數
譬喻所不能及也

爾時世尊欲重宣此義而說偈言

舍利弗來世成佛普智尊號名曰華光當度無量衆
供養無數佛具足菩薩行十力等功德證於無上道

過無量劫已劫名大寶嚴世界名離垢清淨無瑕穢
以琉璃爲地金繩界其道七寶雜色樹常有華果實
彼國諸菩薩志念常堅固神通波羅蜜皆已悉具足
於無數佛所善學菩薩道如是等八十華光佛所化
佛爲王子時齊國捨世榮於最末以身出家成佛道
華光佛住世壽十二小劫其國人以衆壽命八小劫
佛滅度之後正法住於世三十二小劫廣度諸衆生
正法滅盡已像法三十二舍利廣流布天人普供養
華光佛所爲其事皆如其兩足至尊最勝無倫匹
彼卽是汝身宜應自欣慶

論曰經則先叙時節進修之因而後叙佛號偈則

先叙佛號而後叙時節進修之因經必有旨也蓋成佛之義不可以時論圓覺經金剛藏菩薩嘗問佛曰若諸衆生本來成佛何故復有一切無明若諸無明衆生本有何因緣故如來復說本來成佛十方異生本成佛道後起無明一切如來何時復生一切煩惱而佛特不答但呵之曰一切世界始終生滅前後有無聚散起止念念相續循環往復種種取舍皆是輪回未出輪回而辯圓覺彼圓覺性卽同流轉若免輪回無有是處以佛所呵之辭以觀此經所叙先後之不倫則成佛不可以時論明矣

爾時四部衆比丘比丘尼優婆塞優婆夷天龍夜叉乾闥婆阿脩羅迦樓羅緊那羅摩睺羅伽等大衆見舍利弗於佛前受阿耨多羅三藐三菩提記心大歡喜踊躍無量各各脫身所著上衣以供養佛釋提桓因梵天王等與無數天子亦以天妙衣天鬘陀羅華摩訶曼陀羅華等供養於佛所散天衣住虛空中而自回轉諸天伎樂百千萬種於虛空中一時俱作雨衆天華而作是言佛昔於波羅奈初轉法輪今乃復轉無上最大法輪尔時諸天子欲里宣此義而說偈

言

昔於波羅奈轉四諦法輪分別說諸法五衆之生滅

今復轉最妙無上大法輪是法甚深奧少有能信者我等從昔來數聞世尊說未曾聞如是深妙之上法世尊說是法我等皆隨喜大智舍利弗今得受尊記我等亦如是必當得作佛於一切世間最尊無有上佛道叵思議方便隨宜說我所有福業今世若過世及見佛功德盡回向佛道

爾時舍利弗白佛言世尊我今無復疑悔親於佛前得受阿耨多羅三藐三菩提記是諸千二百心自在者昔住學地佛常教化言我法能離生老病死究竟涅槃是學無學人亦各自以離我元及有無見等謂得涅槃而今於世尊前聞所未聞皆墮疑惑善哉世

尊願爲四衆說其因緣令離疑悔

論曰前文叙舍利弗成佛之國名曰離垢其土平正清淨嚴飾乃至黃金界側七寶行樹而其劫名大寶莊嚴以有諸大菩薩威德神變諸妙光明以爲伴助是國也可謂殊勝妙淨者矣至於下文有大長者其家廣大唯有一門乃至有五百人止住其中周障屈曲雜穢充徧諸惡蟲輩交橫馳走諸怪禽獸異狀之鬼如是諸難恐畏無量是宅也可謂汗穢不祥者矣然殊勝妙淨之國爲身土之報汗穢不祥之宅爲五陰區宇之譬非二法也惟衆生心所趣向而隨順之如何耳華嚴論曰以迷十

二有支名一切衆生悟十二有支卽是佛故衆生
及以有支皆無自性若隨煩惱無明行識名色六
相相對生觸受愛取有成五蘊身卽有生老病死
常流轉故若以戒定慧觀照方便力照自身心境
體相皆自性空無內外有卽衆生心全佛智海故
偈曰欲知諸佛心當觀佛智慧佛智無依處如空
無所依衆生種種樂及諸方便智皆依佛智起自
是而觀則諸天所脫上妙之衣於虛空而自回轉
者欲示回而隨順殊勝淨妙之國之象也何以知
之維摩經曰慚愧上服豈非諸天以其耽著三界
火宅之久而聞舍利弗成佛之國嚴淨競生慚愧

乎不然何天樂自奏天華自雨而衣獨回轉耶

爾時佛告舍利弗我先不言諸佛世尊以種種因緣
譬喻言辭方便說法皆爲阿耨多羅三藐三菩提耶
是諸所說皆爲化菩薩故然舍利弗今當復以譬喻
更明此義諸有智者以譬喻得解舍利弗若國邑聚
落有大長者其年衰邁財富無量多有田宅及諸僮
僕其家廣大唯有一門多諸人衆一百二百乃至五
百人止住其中堂閣朽故墻壁隕落柱根腐敗梁棟
傾危周市俱時欻然火起焚燒舍宅長者諸子若十
二十或至三十在此宅中長者見是大火從四面起
卽大驚怖而作是念我雖能於此所燒之門安隱得

出而諸子等於火宅內樂著嬉戲不覺不知不驚不怖火來逼身苦痛切已心不厭患無求出意

論曰或謂之國謂之邑謂之聚落則欲界色界無色界也大富長者則佛世尊也幻滅都盡慧光渾圓故言其身老邁萬德成就光嚴住持故言財富無量涅槃法界吾所轉也天魔外道吾所役也故言多有田宅及諸童僕區三界以爲宅一佛乘以爲歸故言其家廣大唯有一門紛然六趣之中幻出五蘊之聚故言多諸人衆一百二百乃至五百其中止住也然不直曰五百而曰一百二百乃至五百何也曰無明緣行行緣識識緣名色次第而

具故也三苦之趣旣成則生老病死諸苦之火無所可逃其來迅速故言堂閣朽故乃至俱時欬然火起焚燒舍宅也佛視聲聞辟支佛則二乘子也視菩薩則大乘子也然衆生皆佛之子何獨以三乘爲子乎曰彼方捨父逃逝未還唯三乘之子行至父舍故變百言十者明衆生入三乘者纔十一也况至佛乘者乎於是佛觀六趣之苦而悲之初見而驚旣驚而怖佛豈有是哉以其子病故父母亦病之謂也故言見是大火從四面起卽大驚怖也我爲度衆生而生三界而諸衆生方深者五欲以貪著故不覺不知不驚不怖故言我雖能於此

所燒之門安隱得出而諸子等於火宅內樂著嬉戲乃至無求出意也

舍利弗是長者作是思惟我身手有力當以衣裓若以几案從舍出之復更思惟是舍唯有一門而復狹小諸子幼稚未有所識戀著戲處或當墮落爲火所燒我當爲說怖畏之事此舍已燒宜時疾出無令爲火之所燒害作是念已如所思惟具告諸子汝等速出父雖憐愍善言誘諭而諸子等樂著嬉戲不肯信受不驚不畏了無出心亦復不知何者是火何者爲舍云何爲失但東西走戲視父而已

論曰以欲荷擔大法提挈四生故言身手有力承

以解脫之服熏以知見之香履以方便之智凭以廣大之願故言當以衣裓若以几案從舍而出西域以衣裓爲盛花之器以獻尊貴者而裓常有香阿舍經曰初七思惟所得法如用衣裓二七思惟衆生根緣如用几三七思惟樹地恩如用案然所得法卽佛之知見也所欲說卽種種方便之智也所念恩卽廣大度生之願也唯此一佛乘之法微妙難入故言唯有一門而復狹小也衆生於五濁惡世未能出離爲說佛智莫之能度故言諸子幼稚未有所識戀著嬉戲或當墮落爲火所燒如下文曰衆生未免生老病死憂悲苦惱而爲三界火

宅所燒何由能解佛之智慧是也由不知有苦不知有苦集不知忘失慧命之由雖出生入死或值佛世而不知聞法故言亦復不知何者是火何者爲舍何者爲失東西走戲視父而已如下文曰於此三界東西馳走雖遭大苦不以爲患是也背明投暗故言東西生死往還速疾故言馳走而於是中特起見愛故言戲

爾時長者卽作是念此舍已爲大火所燒我及諸子若不時出必爲所焚我今當設方便令諸子等得免斯害父知諸子先心各有所好種種珍玩奇異之物情必樂著而告之言汝等所可玩好希有難得汝若

不取後必憂悔如此種種羊車鹿車牛車今在門外可以遊戲汝等於此火宅宜速出來隨汝所欲皆當與汝

論曰佛爲度衆生而生三界若捨方便則一大事因緣亦幾乎息矣則父子俱喪故言我及諸子必爲所焚以是先令出苦乃說實道故言當設方便令諸子等得免斯害如下文曰雖有力無所畏而不用之但以智慧方便於火宅拔濟衆生是也知諸衆生心有種種欲隨宜所說故言父知諸子先心各有所好乃至宜速出來隨汝所欲皆當與汝如下文曰爲說聲聞辟支佛佛乘稱讚三乘誘令

脫苦又言汝等莫得樂住三界勿貪羸弊色聲香味觸速出三界當得三乘此三乘法皆是聖所稱歎等是也

爾時諸子聞父所說珍玩之物適其願故心各勇銳互相推排競共馳走爭出火宅是時長者見諸子等安隱得出皆於四衢道中露地而坐無復障礙其心泰然歡喜踊躍

論曰於此論修證行相之差別勤惰超升之後先故言心各勇銳互相推排於八正道之共由而有遲疾故言競共馳走爭出火宅車馳謂之馳徒走謂之走以此而得出三界火宅故下文曰自求涅

槃求自然慧求一切智而名聲聞辟支佛佛乘出於火宅是也夫出三界險道三乘交會之處以四諦法而自觀照故言四衢道中然見惑雖除思惟猶在不名露地至三界思惟已盡故言露地以住果不進故言而坐不爲見思所局故言泰然生滅度安隱想故言歡喜如下文曰如來爲一切衆生之父若見無量億千衆生以佛教門出三界苦怖畏險道得涅槃樂是也

時諸子等各白父言父先所許玩好之具羊車鹿車牛車願時賜與舍利弗等時長者各賜諸子等一大車其車高廣衆寶莊校周帀欄楯四面懸鈴又於其

上張設幘蓋亦以珍奇雜寶而嚴飾之寶繩交絡垂
諸華璵重敷婉筵安置丹枕駕以白牛膚色充潔形
體姝好有大筋力行步平正其疾如風又多僕從而
侍衛之

論曰羊鹿二車小而非大牛與羊鹿大而非一今
無羊鹿之二車亦無羊鹿牛之三車故言等與一
大車而已舍利弗既疑佛獨以小乘濟度謂一佛
乘外有別出之二乘又疑我等同入法性謂一佛
乘中有分別之三乘今皆無之唯一佛乘以此乘
無上無邊故言其車高廣萬行之所莊嚴故言衆
寶莊校總持之所護遮故言周帀欄楯以四辯之

下化故言四面懸鈴以慈悲之普覆故言上張幘
蓋又以衆善嚴此慈悲也故言亦以珍奇雜寶而
嚴飾之又以四誓固此慈悲也故言寶繩交絡用
四攝以和悅之如華用神通以驚動之如璵故言
垂諸華璵以諸定之柔軟故言重敷婉筵緹以安
其身故第一義之安隱故言安置丹枕枕以與其
首故西域枕中以綿實之外以赤皮鞞之故名丹
枕清淨調伏福慧兩足故言駕以白牛膚色充潔
貌悴骨剛堪任大事故言形體姝好有大筋力以
定慧等持疾至薩婆若海故言行步平正其疾如
風衆魔外道惟所使令故言又多僕從而侍衛之

如下文曰悉與諸佛禪定解脫娛樂之具皆是一相一種聖所稱歎能生淨妙第一之樂是也

所以者何是大長者財富無量種種諸藏悉皆充溢而作是念我財物無極不應以下劣小車與諸子等今此幼童皆是吾子愛無偏黨我有如是七寶大車其數無量應當等心各各與之不宜差別所以者何以我此物周給一國猶尚不匱何況諸子是時諸子各乘大車得未曾有非本所望舍利弗於汝意云何是長者等與諸子珍寶大車寧有虛妄不舍舍利弗言不也世尊是長者但令諸子得免火難全其軀命非爲虛妄何以故若全身命便爲已得玩好之具况復

方便於彼火宅而拔濟之世尊若是長者乃至不與最小一車猶不虛妄何以故是長者先作是意我以方便令子得出以是因緣無虛妄也何況長者自知財富無量欲饒益諸子等與大車

論曰定慧莊嚴法又平等是故說一佛乘今皆作佛故言我有如是七寶大車其數無量應當等心各各與之不宜差別如下文曰我有無量無邊智慧力無所畏諸佛法藏是諸衆生皆是我子等與大乘不令有人獨得減度是也假令初無方便直全軀命軀命之全重於玩好卽是已得玩好之具猶不爲虛况復本設方便拔出火宅寧有虛也此

以方便拔難况直全軀命乎故言得免火難全其
軀命非爲虛妄何以故若全身命便爲已得玩好
之具况復方便於火宅而拔濟之假令財足愛均
直以方便拔難猶不爲虛况復財富等欲饒益寧
有虛也故言自知財富無量欲饒益諸子等與六
車如下文曰如來亦復如是無有虛妄引導衆生
然後但以大乘而度脫之何以故如來有無量智
慧力無所畏諸法之藏是也

佛告舍利弗善哉善哉如汝所言舍利弗如來亦復
如是則爲一切世間之父於諸怖畏衰惱憂患無明
暗蔽未盡無餘而悉成就無量知見力無所畏有十

神力及智慧力具足方便智慧波羅蜜大慈大悲常
無懈倦恒求善事利益一切而生三界朽故火宅爲
度衆生生老病死憂悲苦惱愚癡暗蔽三毒之火教
化令得阿耨多羅三藐三菩提見諸衆生爲生老病
死憂悲苦惱之所燒煑亦以五欲財利故受種種苦
又以貪著追求故現受衆苦後生地獄畜生餓鬼之
苦若生天上及在人間貧窮困苦愛別離苦怨憎會
苦如是等種種諸苦衆生沒在其中歡喜遊戲不覺
不知不驚不怖亦不生厭不求解脫於此三界火宅
東西馳走雖遭大苦不以爲患舍利弗佛見此已便
作是念我爲衆生之父應拔其苦難與無量無邊佛

智慧樂令其遊戲舍利弗如來復作是念若我但以神力及智慧力捨於方便爲諸衆生讚如來知見力無所畏者衆生不能以是得度所以者何是諸衆生未免生老病死憂悲苦惱而爲三界火宅所燒何由能解佛之智慧舍利弗如彼長者雖復身手有力而不用之但以殷勤方便勉濟諸子火宅之難然後各與珍寶大車如來亦復如是雖有力無所畏而不用之但以智慧方便於三界火宅拔濟衆生爲說三乘聲聞辟支佛佛乘而作是言汝等莫得樂住三界火宅勿貪麤弊色聲香味觸也若貪著生愛則爲所燒汝速出三界當得三乘聲聞辟支佛佛乘我今爲汝

保任此事終不虛也汝等但當勤修精進如來以是方便誘進衆生復作是言汝等當知此三乘法皆是聖所稱歎自在無繫無所依求乘是三乘以無漏根力覺道禪定解脫三昧等而自娛樂便得無量安隱快樂舍利弗若有衆生內有智性從佛世尊聞法信受殷勤精進欲速出三界自求涅槃是名聲聞乘如彼諸子爲求羊車出於火宅若有衆生從佛世尊聞法信受殷勤精進求自然慧樂獨善寂深知諸法因緣是名辟支佛乘如彼諸子爲求鹿車出於火宅若有衆生從佛世尊聞法信受勤修精進求一切智佛智自然智無師智如來知見力無所畏愍念安樂無

量衆生利益天人度脫一切是名大乘菩薩求此乘
故名爲摩訶薩如彼諸子爲求牛車出於火宅舍利
弗如彼長者見諸子等安隱得出火宅到無畏處自
惟財富無量等以大車而賜諸子如來亦復如是爲
一切衆生之父若見無量億千衆生以佛教門出三
界苦怖畏險道得涅槃樂如來亦時便作是念我有
無量無邊智慧力無畏等諸佛法藏是諸衆生皆是
我子等與大乘不令人獨得滅度皆以如來滅度
而滅度之是諸衆生脫三界者悉與諸佛禪定解脫
等娛樂之具皆是一相一種聖所稱歎能生淨妙弟
一之樂舍利弗如彼長者初以三車誘引諸子然後

但與大車寶物莊嚴安隱第一然彼長者無虛妄之
咎如來亦復如是無有虛妄初說三乘引導衆生然
後但以大乘而度脫之何以故如來有無量智慧力
無所畏諸法之藏能與一切衆生大乘之法但不盡
能受舍利弗以是因緣當知諸佛方便力故於一佛
乘分別說三

論曰求自然慧不從人得則優於聲聞然樂獨善
寂不能兼善則劣於菩薩深知諸法因緣此其所
以爲緣覺法不從人得又樂獨善如鹿不依人而
力小於牛也佛徧知一切法一切智卽是佛智佛
名自然人佛智卽自然智自然智卽無師自然智

卽是無師智轉相釋也辟支佛亦名自然人但無一切智止名慧而已譬之牛者以其力大於羊鹿也大乘雖從人得而是法住法位世間相常住故不以依人爲嫌也然未出火宅之時雖大乘猶與羊鹿爲三至其等與則唯一佛乘而已此其所以爲異然經言若有衆生從佛世尊聞法信受勤修精進求一切智佛智自然智無師智如來知見力無所畏則凡夫可以現證以是知佛乘爲不可思議寶篋經曰猶如迦陵頻伽鳥王卵中之子其喙未現便出迦陵頻伽妙聲佛法卵中諸菩薩等未壞我見未出三界然能演出佛法妙音也

佛欲重宣此義而說偈言

譬如長者有一大宅其宅久故而復頓弊堂舍高危柱根摧朽梁棟傾斜基陛墮毀牆壁圯圻泥塗墮落覆苫亂墜椽招差脫周障屈曲雜穢充徧有五百人止住其中鴟梟鷲鷲驚鳥鵲鳩鴿蛇蝮蠍蜈蚣蚰蜒守宮百足鼯狸鼯鼠諸惡蟲輩交橫馳走屎尿臭處不淨流溢蜚蠊諸蟲而集其上狐狼野干咀嚼踐蹋齧齧死屍骨肉狼藉由是群狗競來搏撮飢羸惶惶處處求食聞諍攄掣噉噉吠其舍恐怖變狀如是論曰經文則槩舉其意故略至於偈則備叙其事故詳然三界之相不出無明之三毒利鈍之十使

惡見之與雜染倒想之與細惑也於器界則紛五濁於根身則縛八苦總以異類惡見爲之喻經言其宅久故而復頓弊則變化密移而不覺無常之壓至也基陛墮毀則無明爲基餘緣爲陛基卽堂之基陛卽陛之級自行識以次等級之相緣故以爲陛畢竟變滅故名墮毀也墻壁圯圻則四大之將離泥塗弛落則皮膚之瘦瘠覆苔亂墜則毛髮之遺弃椽栝差脫則骨齒之朽缺周障屈曲雜穢充遍則百骸九竅三十六物塵穢交雜無一淨者豈非衆生著身見也深故歷言之使如虛誑之法一切現前不可恃以爲牢且久也有五百人止住

其中者五道所攝三乘種性也鴟梟鷲鳥鵲鳩鴿則貪毒也甚則孳尾奪攘輕則傳沫目運坑蛇蝮蠍蜈蚣蚰蜒則瞋毒也守宮百足鼪狸鼯鼠則癡毒也守宮食朱砂七斤搗以傳身宮觸則滅百足卽蛇也足多而行不速者也鼪鼠卽鼯夷由五技而窮者也諸惡蟲輩交橫馳走者結前義之辭也屎尿臭處不淨流溢蟻蝨諸蟲而集其上者以明前因貪而生瞋癡此明因癡而有貪愛不辨淨穢故爲癡樂著不捨故爲貪也狐狼野干咀嚼踐蹋者狐貪而疑狼貪而狼野干貪而癡疑則癡之別狠則瞋之別三毒雜相也咀嚼踐蹋則言於不

淨之境味著不厭蹈藉不離也瘠齧死屍骨肉狼藉則言於無常之身計校不捨紛亂不攝也由是群狗競來搏撮飢羸求食則貪之相鬪諍搥掣唯啾嗥吠則瞋之相於不淨之境無常之身而追求爭奪如此則癡之相是爲三毒等分相而諸結使乃至八萬四千煩惱皆由三毒別相及等分相所從生也其舍恐怖變狀如是者亦結之之辭也

處處皆有魑魅魍魎夜叉惡鬼食取人肉毒蟲之屬諸惡禽獸乎乳產生各自藏護夜叉競來爭取食之食之既飽惡心轉熾鬪諍之聲甚可怖畏鳩槃荼鬼蹲踞土埵或時離地一尺二尺往返遊行縱逸嬉戲

捉狗兩足撲令失聲以脚加頸怖狗自樂復有諸鬼其身長大裸形黑瘦常住其中發大惡聲叫呼求食復有諸鬼其咽如針復有諸鬼首如牛頭或食人肉或復啖狗頭髮鬚亂殘害兇險飢渴所逼叫喚馳走夜叉惡鬼諸惡鳥獸飢急四向窺看臄膈如是諸難恐畏無量

論曰前十偈多叙五鈍使煩惱謂貪瞋癡慢疑也而此十偈多叙五利使煩惱謂身見邊見邪見見取戒取也利使徧緣五陰四大故言處處皆有然以喻鬼神者以其有通有智而以鈍使喻禽獸者以其無通無智故也魑魅魍魎者魑之言離魅之

言昧翹之言罔翹之言兩凡諸鬼物同一法性皆由離而不守昧而不明罔而不出兩而不一依止諸見具六十二故夜叉捷疾之鬼食人肉則撥無善因果者食惡蟲類則撥無惡因果者如外道富蘭那迦葉謂一切法斷滅性空卽無生死果報者也乎乳產生者世間之法從自類因生自類果各自藏護者以因中有果名藏必得不失名護言此者明善惡因果皎然利生以暴外道邪見之惡也邪見具足爲飽邪見蔓苾爲熾造爲諍論陷人於惡趣如聞之聲可怖畏也鳩槃荼可畏而勝者則有漏善能生勝處六欲諸天欲界之高處有土埵

之象而此鬼蹲踞之或時離地一尺二尺者則色界無色界也往返遊行縱逸嬉戲則往來三界或升或墮戀著不出而娛樂無厭也捉狗兩足撲令失聲則謗無苦集以脚加頸怖狗自樂則謗無滅道如外道毗闍夜毗羅胝子謂道不須求但經生死劫數苦自盡得以狗喻苦則見苦斷集如兩足之相須也今則以道爲不須求使苦集之說不行則捉其兩足撲令失聲也修道而後證滅如首之在上足之在下也今則以爲苦盡自得道以沮厭苦之意令自放逸則是以脚加頸怖狗自樂者也復有諸鬼其身長大者豎以計三世爲我謂之長

橫以計五陰爲我謂之大無慚愧之衣故言裸無
白淨之法故言黑無功德之質故言瘦堅執其所
見未嘗暫捨故言常住其中發聲宣說爲惡聲冀
望得果爲求食其咽如針則氣縷命危而延其壽
此非想無常而計以爲涅槃者也首如牛頭者斷
常二邊牛之兩角也智度論曰邊地人有人而牛
首者計斷不修善因如食人之肉計常不求苦滅
如復食狗之肉依止諸見紛然不能料理故言頭
髮鬖亂以斷破常以常破斷故言殘害兇險無智
定飲食以自滋養故言飢渴所逼以諍論之往返
故言叫喚馳走然欲界煩惱之相俱是有漏之心

以常無道味深著邪見不能自出故言飢急四向
闕看窓牖也如是諸難恐畏無量者結前義之辭也
是朽故宅属于一人其人近出未久之間於後宅舍
忽然火起四面一時其燄俱熾棟梁椽柱爆聲震裂
摧折墮落牆壁崩倒諸鬼神等揚聲大叫

論曰夫三界者佛應化之所其初發心願度脫一
切有情故言是朽故宅属于一人我於大通智勝
佛時常教汝等當伏五濁由我應緣他方而汝等
機感已盡五濁便起故言其人近出如下文曰數
現涅槃卽是出宅之意也四面一時其燄俱熾者
則身受心法等起四倒起五濁起八苦起相續漸

增故言俱熾命已斷則諸根自壞故言棟梁椽柱
爆聲震裂氣消體解故言摧折墮落墻壁崩倒於
是時諸見紛亂欲靜不可故言揚聲大叫

鷓鴣諸鳥鳩槃荼等周障惶怖不能自出惡獸毒蟲
藏窟孔穴毗舍闍鬼亦住其中薄福德故爲火所逼
共相殘害飲血噉肉野干之屬並已前死諸大惡獸
競來食噉臭烟蓬焯四面充塞蜈蚣蚰蜒毒蛇之類
爲火所燒爭走出穴鳩槃荼鬼隨取而食又諸餓鬼
頭上火焚飢渴熱惱周障悶走其宅如是甚可怖畏
毒害火災衆難非一

論曰於此示色界火起之相也鳩槃荼等周障惶

怖者鳩槃荼惡見也以愛想輕飛纏於惡見故言
不能自出惡獸毒蟲藏窟孔穴者四禪之定如孔
穴被燒之類雖不及門外泰然不遭猛燄如禪定
之中不見欲界麤弊之惡也毗舍闍鬼亦住其中
者孔穴之中雖無猛燄猶有熱惱則四禪無欲界
之惡亦有愛味細苦故見愛交凌如相飲噉故言
共相殘害飲血噉肉則謂於禪中起諸見不能生
無漏定默如飲血又著五支喜如噉肉野干之屬
則貪相也謂欲界之貪未來之定已斷故言並已
前死諸大惡獸競來食噉臭烟蓬焯充塞四面者
則輕貪先亡重愛未去如惡獸之噉野干惡覺回

環如臭烟之充塞也於此又示無色界火起之相也厭色界定出而向無色界以厭觀麤境而欲觀無色之法如蜈蚣毒蛇之類遭燒出穴若得無色界定必滅色界之緣故言隨所取食又諸餓鬼頭上火焚者無色非想雖居最頂然猶生滅不停未度諸苦何則心異念故名生苦念念不住故名老苦行擾擾妨定故名病苦以是退定故名死苦求定不得卽求不得苦必爲障礙卽冤憎會苦四陰卽五陰盛苦愛著此定欲出不忍卽愛別離苦以無無漏酒故言飢渴以未出輪回故言悶走也其宅如是甚可怖畏毒害火災衆難非一者結之之

辭也

是時宅主在門外立聞有人言汝諸子等先因遊戲來入此宅稚小無知歡娛樂著長者聞已驚入火宅方宜救濟今無燒害告喻諸子說衆患難惡鬼毒蟲災火蔓延衆苦次第相續不絕毒蛇虻蝮及諸夜叉鳩槃荼鬼野干狐狗鴟鷂梟百足之屬飢渴惱急甚可怖畏此苦難處復大火諸子無知雖聞父誨猶故樂著嬉戲不已

論曰我於此所燒之門安隱得出故言在門外立聞火宅之難思所由濟之意也前文旣言我以佛眼觀見六道衆生之苦今乃言聞有人言何也曰

此譬喻也譬喻則言聞有人者蓋是起後語之端耳若所言佛眼觀見六道則是稱法所演如實之義也先因遊戲來入此宅者三界之相起於戲論以戲論故則有生死首楞嚴經曰從畢竟無成究竟有而佛歎嗟爲起大悲故言驚入施巧方便故言告喻則所叙患難鬼物爲可怖畏也宅以火故言災火蔓延則因惑生苦宅旣已壞則當修宅故言衆苦次第也然緣生之中無明緣行行緣識等以成三苦之聚故言相續不絕所謂毒蛇蚯蚓及諸夜叉一切惡見三毒之相紛然復起矣則佛雖以方便誘喻終不信受故言猶故樂著嬉戲不已也

是時長者而作是念諸子如此益我愁惱今此舍宅無一可樂而諸子等耽湎嬉戲不受我教將爲火害卽便思惟設諸方便告諸子等我有種種珍玩之具妙寶好車羊車鹿車大牛之車今在門外汝等出來吾爲汝等造作此車隨意所樂可以遊戲諸子聞說如此諸車卽時奔競馳走而出到於空地離諸苦難長者見子得出火宅住於四衢坐師子座而自慶言我今快樂此諸子等生育甚難愚小無知而入險宅多諸毒蟲魑魅可畏大火猛燄四面俱起而此諸子貪著嬉戲我已救之令得脫難是故諸人我今快樂尔時諸子知父安坐皆詣父所而白父言願賜我等

三種寶車如前所許諸子出來當以三車隨汝所欲
今正是時惟垂給與長者大富庫藏衆多金銀琉璃
磲磔瑪瑙以衆寶物造諸大車莊校嚴飾周帀欄楯
四面懸鈴金繩交絡真珠羅網張施其上金華諸瓔
處處垂下衆綵雜飾周帀圍繞柔軟繒纒以爲茵褥
上妙細氈價直千億鮮白淨潔以覆其上有大白牛
肥壯多力形體姝好以駕寶車多諸僮從而侍衛之
以是妙車等賜諸子諸子是時歡喜踊躍乘是寶車
遊於四方嬉戲快樂自在無礙告舍利弗我亦如是
衆聖中尊世間之父一切衆生皆是吾子深著世樂
無有憊心三界無安猶如火宅衆苦充滿甚可怖畏

常有生老病死憂患如是等火熾然不息如來已離
三界火宅寂然閑居安處林野今此三界皆是我有
其中衆生悉是吾子而今此處多諸患難唯我一人
能爲救護雖復教詔而不信受於諸欲染貪著深故
以是方便爲說三乘令諸衆生知三界苦開示演說
出世間道是諸子等若心決定具足三明及六神通
有得緣覺不退菩薩汝舍利弗我爲衆生以此譬喻
說一佛乘汝等若能信受是語一切皆當成佛道
是乘微妙清淨第一於諸世間爲無有上佛所悅可
一切衆生所應稱讚供養禮拜無量億千諸力解脫
禪定智慧及佛餘法得如是乘今諸子等日夜劫數

常得遊戲與諸菩薩及聲聞衆乘此寶乘直至道場
以是因緣十方諦求更無餘乘除佛方便告舍利弗
汝諸人等皆是吾子我則是父汝等累劫衆苦所燒
我皆濟拔今出三界我雖先說汝等滅度但盡生死
而實不滅今所應作唯佛智慧若有菩薩於是衆中
能一心聽諸佛實法諸佛世尊雖以方便所化衆生
皆是菩薩若人小智深著愛欲爲此等故說於苦諦
衆生心喜得未曾有佛說苦諦真實無異若有衆生
不知苦本深著苦因不能棄捨爲是等故方便說道
諸苦所因貪欲爲本若滅貪欲無所依止滅盡諸苦
名第三諦爲滅諦故修行於道離諸苦縛名得解脫
是人於何而得解脫但離虛妄名爲解脫其實未得
一切解脫佛說是人未實滅度斯人未得無上道故
我意不欲今至滅度

論曰前文學無學人亦各自以離我見及有無見
便謂已得涅槃者彼安知秘密藏大涅槃哉佛性
論曰如摩隸特經說世尊若涅槃是有我今自有
聰明利智云何不見佛言涅槃實有汝今未得無
分別聖智故不得見以微細故非聞慧所得以真
實故非思慧所得夫以聞慧思慧之妙且不能以
得之則但離虛妄名爲解脫者豈能得之耶問曰
說三乘而單言四諦四諦三乘皆具耶曰四諦於

華嚴經則名四聖諦盖三乘之通法也隨其所證
淺深如何耳辟支佛觀無明乃至老死是爲苦集
觀無明盡乃至老死盡是爲滅道菩薩觀四諦卽
是一諦頓漸有異故也

我爲法王於法自在安隱衆生故現于世汝舍利弗
我此法卽爲欲利益世間故說在所遊方勿妄宣傳
若有聞者隨喜頂受當知是人阿惟越致若有信受
此經法者是人已曾見過去佛恭敬供養亦聞是法
若人有能信汝所說則爲見我亦見於汝及比丘僧
弁諸菩薩斯法華經爲深智說淺識聞之迷惑不解
一切聲聞及辟支佛於此經中力所不及汝舍利弗

尚於此經以信得入况餘聲聞其餘聲聞信佛語故
隨順此經非已智分

論曰信有二種一者智通之信二者依通之信智
通之信者所謂一切智無師智自然智悉已成就
信如來出世說法度生入般涅槃始終不出一刹
那際故經言汝舍利弗尚於此經以信得入者智
通之信也依通之信者所謂以情解故疑網不除
且信佛語故經言其餘聲聞信佛語故隨順此經
非已智分者依通之信也晉王羲之以善書名世
其子弟皆師其筆法羲之方落筆時手忘筆筆忘
法心融神會點畫所至意態自足師其筆法者手

不忘筆心不忘字通則行否則止皆曰書也如義
之者智通之信也師之者依通之信也舊疏曰此
以不定性二乘方順生信故謂舍利弗如汝上根
尚信我語方漸證入况餘不定性聲聞乎悞矣
又舍利弗憍慢懈怠計我見者莫說此經凡夫淺識
深著五欲聞不能解亦勿爲說若人不信毀謗此經
則斷一切世間佛種或復顰蹙而懷疑惑汝當聽說
此人罪報若佛在世若滅度後其有誹謗如斯經典
見有讀誦書持經者輕賤憎嫉而懷結恨此人罪報
汝今復聽其人命終入阿鼻獄具足一劫劫盡更生
如是展轉至無數劫從地獄出當墮畜生若徇野干

其形頽瘦鰲黠疥癩人所觸媿又復爲人之所惡賤
常困飢渴骨肉枯竭生受楚毒死被瓦石斷佛種故
受斯罪報若作駝駝或生驢中身常負重加諸杖捶
但念水草餘無所知謗斯經故獲罪如有作野干
來入聚落身體疥癩又無一目爲諸童子之所打擲
受諸苦痛或時致死於此死已更受蟒身其形長大
五百由旬聾騃無足宛轉腹行爲諸小蟲之所啣食
晝夜受苦無有休息謗斯經故獲罪如是若得爲人
諸根闇鈍姪陋癡盲聾背偃有所言說人不信受
口氣常臭鬼魅所著貧窶下賤爲人所使多病瘠瘦
無所依怙雖親附人人不在意若有所得尋復忘失

若修醫道順方治病更增他疾或復致死若自有病無人救療設服良藥而復增劇若他反逆抄劫竊盜如是等罪橫罹其殃如斯罪人永不見佛衆聖之王說法教化如斯罪人常生難處狂聾心亂永不聞法於無數劫如恒河沙生輒聾瘖諸根不具常處地獄如遊園觀在餘惡道如已舍宅駝驢豬狗是其行處謗斯經故獲罪如是若得爲人聾盲瘖貧窮諸衰以自莊嚴水腫乾癆疥癩癰疽如是等病以爲衣服身常臭處垢穢不淨深苦我見增益瞋恚淫欲熾盛不擇禽獸謗斯經故獲罪如是告舍利弗謗斯經者若說其罪窮劫不盡以是因緣我故語汝無智人中

莫說此經若有利根智慧明了多聞強識求佛道者如是之人乃可爲說若人曾見億百千佛植諸善本深心堅固如是之人乃可爲說若人精進常修慈心不惜身命乃可爲說若人恭敬無有異心離諸凡愚獨處山澤如是之人乃可爲說又舍利弗若見有人捨惡知識親近善友如是之人乃可爲說若見佛子持戒清淨如淨明珠求大乘經如是之人乃可爲說若人無瞋質直柔軟常愍一切恭敬諸佛如是之人乃可爲說復有佛子於大衆中以清淨心種種因緣譬喻言辭說法無礙如是之人乃可爲說若有比丘爲一切智四方求法合掌頂受但樂受持大乘經典

乃至不受餘經一偈如是之人乃可爲說如人至心
求佛舍利如是求經得已頂受其人不復志求餘經
亦未曾念外道典籍如是之人乃可爲說告舍利弗
我說是相求佛道者窮劫不盡如是等人則能信受
汝當爲說妙法華經

論曰自又舍利弗至莫說此經凡三十六偈詳言
謗經者所獲報所言斯經者非語言品目紙墨文
字也一切衆生之自心也受持讀誦書寫演說者
經行坐卧折旋俯仰不令餘念敢間斷之故謗之
爲言不信也至親者心也而不信反信物是謂顛
倒夫顛倒者必流轉故佛歷言其故謂生地獄中

徧嘗諸苦尚餘苦業生旁生中徧嘗諸苦嘗業盡
矣乃生人趣然爲順後之業而昏荒鄙暗時世所
憎嫉固其所也首楞嚴經曰阿難是諸衆生非破
律儀犯菩薩戒毀佛涅槃諸餘罪業歷劫燒然後
還罪畢受諸鬼形乃至鬼業既盡則情與想二俱
成空方於世間與元負人寃對相值身爲畜生酈
其宿債從是畜生酬償先債若彼酬者分越所酈
此等衆生還復爲人反徵其剩此言毀佛涅槃者
罪報如是則諸佛之涅槃衆生之自心非二法也
無盡居士論曰舍利弗既悟三乘方便之義疑悔
永盡定知作佛佛以秘護之語於天人婆羅門大

衆中示以宿命令憶本願授記於未來世作佛號
曰華光劫名大寶莊嚴所謂大寶者其國以菩薩
爲大寶故也此諸菩薩皆久植德本於無量百千
萬億佛所淨修梵行此猶如今者彌勒菩薩在兜
率內院教化上生天衆於當來下生龍華授記其
事同也琉璃爲地以表淨光有八交道以表八正
金繩界道以表戒體七寶行樹以表七覺寶華承
足以表履踐雜色華果以表行解淨業如是依報
亦然舍利弗旣得記已千二百心自在者聞所未
聞皆墮疑惑舍利弗請佛爲說因緣佛言吾先以
譬喻言辭方便說法皆爲化菩薩故然當復以譬

喻更明其義有大長者其年衰邁則佛之將入涅槃也其家廣大唯有一門則十方佛乘無二無三
也有五百人止住其中則五陰衆生也堂閣朽故
則無所觀也墻壁墮落則無所聞也柱根腐敗則
下無以立梁棟傾危則上無以承欻然火起則病
苦將至戀著嬉戲則不知恐怖鴟梟鷲鷲以言其
搏擊也烏鵲鳩鴿以言其喧淫也蛇蠍蜈蚣
蚰蜒以言其毒守宮百足以言其擾動鼯鼯鼠
以言其偷伏蟻蝮諸蟲以言其穢狐狼野干以言
其貪群狗嗥吠以言其爭夜叉競來以言其殘鳩
鵲茶鬼以言其虛餓鬼周樟以言其熱惱毗舍闍

鬼以言其本欲害人而亦遭其害也凡此之類起於三毒無明增爲八萬四千煩惱以一身之微而具足如此皆由執著樂戀佛愍此故度以三乘而引出火宅賜以一大寶乘駕以白牛則一體純淨寶飾莊嚴則萬行相暉悟於譬喻之理得於言辭之表此聲聞所以次第授記也

妙法蓮華經信解品第四

爾時慧命須菩提摩訶迦旃延摩訶迦葉摩訶目犍連從佛所聞未曾有法世尊授舍利弗阿耨多羅三藐三菩提記發希有心歡喜踊躍卽從座起整衣服偏袒右肩右膝著地一心合掌曲躬恭敬瞻仰尊顏

而白佛言我等居僧之首年並朽邁自謂已得涅槃無所堪任不復進求阿耨多羅三藐三菩提世尊往昔說法旣久我時在座身體疲倦但念空無相無作於菩薩法遊戲神通淨佛國土成就衆生心不喜樂所以者何世尊令我等出於三界得涅槃證又今我等年已朽邁於佛教化菩薩阿耨多羅三藐三菩提不生一念好樂之心我等今於佛前聞授聲聞阿耨多羅三藐三菩提記心甚歡喜得未曾有不謂於今忽然得聞希有之法深自慶幸獲大善利無量珍寶不求自得

論曰維摩經曰若菩薩欲得淨土當淨其心隨其

心淨則佛土淨者心空則佛土空也圓覺經曰一
世界清淨故多世界清淨者一世界空故多世界
空也何以知清淨謂之空耶智度論曰清淨者卽
空義以衆生畏空故言清淨以遮之耳諸佛菩薩
之談空法如聲度牆無所留礙如山出雲無有窮
極而諸衆生不知無始世來虛妄受用也聲香味
等諸外境界皆亦實無而誠以執著之深故顛倒
不信於是以大悲方便空諸所有使諸衆生自覺
成就如經言於菩薩法遊戲神通淨佛國土成就
衆生而須菩提自言方念空無相無作之法而聞
菩薩境界心不喜樂也問曰菩薩遊戲神通淨佛

國土可也乃曰成就衆生何哉曰諸佛菩薩之欲
成就衆生如天地之於萬物始則雷霆以震驚之
雨暘以發生之終則以風露以長養之雪霜以成
熟之也故其威怒之嚴慈祥之和或逆或順或與
或奪皆非苟然佛以神力令寶積五百長者子蓋
合而成一徧覆三千大千而此世界廣長之相悉
於中現又此三千大千世界諸須彌山等乃至大
海江河川流泉源及日月星辰諸龍宮殿悉現蓋
中又十方諸佛諸菩薩說法亦現蓋中此何意耶
曰欲以是三昧方便壞二乘凡夫之見惑也見惑
壞滅則慧身現前華嚴經曰知一切法卽心自性

成就慧身不由他教又示阿難五體之光遠灌十方微塵如來及法王子諸菩薩頂彼諸如來亦於五體同放寶光從微塵方來灌佛頂并灌會中諸大菩薩及阿羅漢林木池沼皆演法音交光相羅如寶絲網此何意耶曰欲以是無分別智光破二乘凡夫之癡暗也癡暗破除則自心發露楞伽經曰由自心執著心似外境轉彼所見非有是故說惟心以維摩首楞嚴二經之旨以證華嚴楞伽二經之義而合此經之意如風中鼓索雖有大智莫能分也又問菩薩遊戲神通以淨佛國土謂之空與二乘之但念空無相無作何以異哉曰二乘觀空取證者也何敢望菩薩遊戲神通顯發色心不二之空乎

世尊我等今者樂說譬喻以明斯義

論曰佛之訓弟子以其所易曉喻其所難知也須菩提反欲以譬喻以曉佛無乃不自量乎曰非敢以喻異佛得解也如人有疾因醫而愈不能自言其病得愈之證爲醫者言之曰我方病時其熱如湯其痛如楮今其瘳也如湯之涼如楮之去醫者非不知也而其人必譬喻者欲以自喻其不能言而已今佛弟子以喻自明亦復如是

譬若有人年旣幼稚捨父逃逝久住他國或十二

至五十歲年既長大加復窮困馳騁四方以求衣食
漸漸遊行遇向本國其父先來求子不得中止一城
其家大富財寶無量金銀琉璃珊瑚琥珀頗黎珠等
其諸倉庫悉皆盈溢多有童僕臣佐吏民象馬車乘
牛羊無數出入利息乃徧他國商估賈客亦甚衆多
時貧窮子遊諸聚落經歷國邑遂到其父所止之城
論曰譬若有人年既幼稚則癡迷而無知者捨父
逃逝久住他國則亡失本願飄泊六趣伶俚孤苦
而可憐也或二十至五十歲則以劫濁命濁衆
上濁見濁煩惱濁爲五而劫以時分爲名故言歲
也年既長大復加窮困則重種漸熟知以生老病

死之苦爲厭馳騁四方以求衣食隨逐外道不隨
中正以無慚忍之衣無禪定之食故言求也漸漸
遊行則求於漸法而不知頓乘遇向本國則遭遇
佛世而不知失趣也其父先來求子不得則生在
難處而不聞佛法中止一城則爲衆生而生三界
也倉以藏粟則法喜禪悅食之所出庫以藏財則
諸法珍寶之所聚童僕幼賤而親者則初發心菩
薩之未出生死諸見者也臣佐輔已而貴者則得
忍菩薩之助佛揚化者也象馬車乘則佛菩薩乘
其力甚大牛羊無數則大小二乘其法不一出入
息利乃徧他國則教授滋息非道之無所不行商

估賈客亦甚衆多則法商求實險道之無所不歷也時貧窮子遊諸聚落則四生之流轉經歷國邑則三界之往來遂到其父所止之城則幸與佛世際會然前言遇向本國今言所止之城者來歸而彌近也

父每念子與子離別五十餘年而未曾向人說如此事且自思惟心懷悔恨自念老朽多有財物金銀珍寶倉庫盈溢無有子息一旦終沒財物散失無所委付是以殷勤每憶其子復作是念我若得子委付財物坦然快樂無復憂慮世尊今時窮子傭賃展轉遇到父舍住立門側遙見其父踞師子床寶几承足諸婆羅門刹利居士皆恭敬圍繞以真珠瓔珞價直千萬莊嚴其身吏民童僕手執白拂侍立左右覆以寶帳垂諸華幡香水灑地散衆名華羅列寶物出內取與有如是等種種嚴飾威德特尊窮子見父有大力勢卽懷恐怖悔來至此

論曰父每念子則本願之欲度生而不躉捨與子離別五十餘年則衆生之在五濁而不見佛未曾向人說如此事則不說二乘之作佛但自思惟心懷悔恨則教以佛道而悉亡財物散失無所委付則憂法藏之無傳得子快樂無復憂慮則欣佛種之不斷傭賃展轉則資生艱難非坐享富貴者也

則欲以思惟心求證諸果而非本來具足然遇到
父舍則邂逅而遇非出告反面者也則偶值佛興
而非真知歸依之意住立門側不得而入則不知
佛智之正徧遙見其父不得而親則不見法身之
微妙也前言父城今言父舍舍之於城又爲彌近
耳師子床則降衆魔服外道以得無所畏故寶几
承足則依真如境而起福慧以福慧爲兩足故諸
婆羅門刹利居士皆恭敬圍繞則諸大菩薩法位
等級一心之環向以真珠瓔珞價直千萬莊嚴其
身則萬德珍異光明而煥發吏民童僕手執白拂
侍立左右則新學菩薩以白淨法拂除塵氛而入

法位者也覆以寶帳垂諸華幡則慈悲大雲徧覆
一切而四攝之華足以有悅神通之幡足以有動
也香水灑地散衆名華則戒定慧解脫解脫知見
之香清凉其心地而布以七淨之華也羅列寶物
出內取與則諸法之寶無所不有或出而與以利
他或納而取以自利也有如是等種種嚴飾威德
特尊窮子見父有大力勢則具足力無所畏卽懷恐
怖悔來至此則樂小退大雖令志願而悉廢忘也
竊作是念此或是王或是王等非我傭力得物之處
不如往至貧里肆力有地衣食易得若久住此或見
逼迫強使我作作是念已疾走而去時富長者於師

子座見子便識心大歡喜卽作是念我財物庫藏今有所付我常思念此子無由見之而忽自來甚適我願我雖年朽猶故貪惜卽遣傍人急追將還尔時使者疾走往捉窮子驚愕稱怨大喚我不相犯何爲見捉使者執之愈急強牽將還于時窮子自念無罪而被囚執此必定死轉更惶怖悶絕躡地

論曰此或是王或是王等非我傭力得物之處則法報之身本來成道非斷滅取證者之所得預不如往至貧里肆力有地衣食易得則二乘空地可以智證而慙忍之衣禪定之食其求易足也若久住此或見逼迫強使我作則小乘之所畏也作是

念已疾走而去則退大之亟而趣小之堅也二乘空法無如來藏含容萬德故以貧里爲言香積菩薩曰釋迦牟尼佛隱其無量自在之力乃以貧所樂法度脫衆生是也時富長者於師子座見子便識然子雖見父而不知其爲父故恐怖而悔來父之見子卽識其爲子故歡喜而適願則彼雖廢忘而佛所以付囑護念者終不忘也我雖年朽猶故貪惜則煩惱暗蔽雖已永盡而不弃衆生卽遣傍人急追將還尔時使者疾走往捉則令諸菩薩化以頓法而捨其方便窮子驚愕則駭於一乘大教之聞稱怨大喚則畏於煩惱生死之入小乘以煩

惱爲怨聞說煩惱卽菩提故稱寃也以生死爲苦
聞說生死卽涅槃故大喚也我不相犯何爲見捉
則以不求而強伏之故使者執之逾急強牽將還
則以不從而強牽之故自念無罪而被囚執則畏
入三界以爲牢獄也此必定死轉更惶怖則畏失
諸果亡其慧命也菩薩大悲與衆生同入生死獄
以度脫之小乘無此故以爲無罪而不入也悶絕
避地則強之不已謗法不信將墜惡趣也

父遙見之而語使言不須此人勿強將來以冷水灑
面今得醒悟莫復與語所以者何父知其子志意下
劣自知豪貴爲子所難審知是子而以方便不語他

人云是我子使者語之我今放汝隨意所趣窮子歡
喜得未曾有從地而起往至貧里以求衣食尔時長
者將欲誘引其子而設方便密遣二人形色憔悴無
威德者汝可詣彼徐語窮子此有作處倍與汝直窮
子若許將來使作若言欲何所作便可語之雇汝除
糞我等二人亦共汝作時二使人卽求窮子旣已得
之具陳上事尔時窮子先取其價尋與除糞其父見
子愍而怪之又以他日於牕牖中遙見子身羸瘦憔
悴糞土塵全汙穢不淨

論曰父遙見之而語使人勿強將來則以知其子
志意下劣而自知豪富爲子所難故也則知其先

心樂小擬之以大而不信則不強也以冷水洒面
今得醒悟莫復與語則以審知是子而以方便不
語他人云是我子故也則以解脫水解其迷悶雖
審知其終爲佛子而以方便名之爲聲聞也凡言
所以者何皆申前義之辭也使者語之我今放汝
隨意所趣則爲如來使隨佛方便不逼迫之也從
地而起往至貧里以求衣食則免謗大乘罪脫三
塗苦而用其貧所樂法也爾時長者將欲誘引其
子而設方便密遣二人形色憔悴無威德者則以
同事而教化之故言二人也徐語窮子此有作處
倍與汝直則導以漸教有爲之法而許以無爲涅

槃之意也便可語之雇汝除糞則令其思惟蠲除
諸法戲論之糞也我等二人亦共汝作則施其方
便與其同事也旣已得之具陳上事則順佛而施
其化先取其直尋與除糞則慕果而修因也其父
見子愍而怪之則愍其失大怪其樂小又以他日
於窓牖中則隱其妙淨殊勝之身不以示之之意
也遙見子身羸瘦憔悴則福智薄少而怖畏諸苦
糞土塵空汙穢不淨則戲論未除而樂觀不淨也
卽脫瓔珞細軟上服嚴飾之具更著麤弊垢膩之衣
塵土全身右手執持除糞之器狀有所畏語諸作人
汝等動作勿得懈怠以方便故得近其子後復告言

咄男子汝常此作勿復餘去當加汝價諸有所須盆
器米麵鹽醋之屬莫自疑難亦有老弊使人須者相
給好自安意我如汝父勿復憂慮所以者何我年老
大而汝少壯汝常作時無有欺怠瞋恨怨言都不見
汝有此諸惡如餘作人自今已後如所生子卽時長
者更與作字名之爲兒

論曰卽脫瓔珞細軟上服嚴飾之具則秘其萬德
莊嚴具足諸好第一微妙之相更著麤弊垢膩之
衣塵土全身則現有麤弊五欲垢重五濁衆惱所
集之身也右手執持除糞之器狀有所畏則以方
便力同用是法斷結成佛示有生死之畏語諸作

人汝等勤作勿得懈怠以方便故得近其子則因
教示現之權人而得近退大之實人也咄男子汝
常此作勿復餘去當加汝價則以苦言督令於中
勤加精進而以煖頂忍法及世第一之法而增益
之諸有所須盆器米麵鹽醋之屬莫自疑難則以
無漏道品之法四禪之食禪支之味與夫諸定三
昧令思惟修無所吝惜亦有老弊使人須者相給
則今所使示現二乘知所應與者給其所須咄則
警覺責數之聲故以喻苦言道品雖無漏法然助
道而已不出乎形器故言盆器初禪有覺有觀二
禪無覺有觀爲麤故言米三禪無覺無觀至於四

禪無出入息爲精故言麪然無喜樂諸支則如淡
食無足味著須鹽醋以和解之故言鹽醋諸定三
昧皆由道品出故爲之屬而已蓋其稱名小而取
類大也老弊使人則向所謂密遣二人形色憔悴
者也好自安意則安其所未安之辭也勿復憂慮
則令斷除煩惱之辭也所以者何我年老大而汝
少壯則我已斷結而汝當勤除苦集不以向之苦
語爲嫌也汝常作時無有欺怠瞋恨怨言如餘作
人則深信我法勤加精進毋如謗法外道諸邪見
者自今以後如所生子更與作字名之爲兒則雖
未爲其子而如來常說我等爲佛子也

爾時窮子雖欣此遇猶故自謂客作賤人由是之故
於二十年中常令除糞過是已後心相體信入出無
難然其所止猶在本處世尊尔時長者有疾自知將
死不久語窮子言我今多有金銀珍寶倉庫盈溢其
中多少所應取與汝悉知之我心如是當體此意
論曰雖欣此遇猶故自謂客作賤人則雖佛子而
猶以斷除客塵煩惱爲事未能說無上道也於二
十年中常令除糞則雖在三十子而猶爲二乘令
盡殘結過是已後則殘結已斷得涅槃之證心相
體信則我加誓而無嫌彼見呵而不怨入出無難
則可語大而不退小之意也然其所止猶在本處

則雖堪聞大而猶居果位也世尊亦時長者有疾
自知將死不久則化緣將畢欲示入滅之相金銀
珍寶倉庫盈溢則諸法財寶之無量其中多少所
應取與汝悉知之則令以其法轉教菩薩我心如
是當體此意則示以諸法皆惟自心令其體之也
金以言之則佛十力四無所畏四無礙智十八不
共法及一切種智以其微妙而相不壞也銀以言
之則菩薩之六波羅蜜以其柔軟白淨之法也珍
寶以言之則一切萬行之光燄倉以藏粟則禪定
食之所自出也庫以藏財則法寶貨之所聚也言
盈溢則既以與人已而愈有既以爲人已而愈多

也多少取與隨宜應量宜多與者無所吝惜宜少
與者雖愛法不爲多說也佛於般若會中令舍利
弗等轉教菩薩一切諸法莫不畢說而會歸於真
空卽其事也

所以者何今我與汝便爲不異宜加用心無令漏失
亦時窮子卽受教勅領知衆物金銀珍寶及諸庫藏
而無希取一食之意然其所止故在本處下劣之心
亦未能捨復經少時父知子意漸以通泰成就大志
自鄙先心臨欲終時而命其子并會親族國王大臣
刹利居士皆悉已集卽自宣言諸君當知此是我子
我之所生於某城中捨吾逝走玲嶠辛苦五十餘年

其本字某我名某甲昔在本城懷憂推覓忽於此間
遇會得之此實我子我實其父今我所有一切財物
皆是子有先所出內是子所知

論曰所以者何今我與汝便爲不異則告以佛菩
薩衆聖賢以至諸法一如無別無異也宜加用心
無令漏失則誠以但弃生滅守於真常無失如來
知見也爾時窮子卽受教勅領知衆物金銀珍寶
及諸庫藏則以承佛旨以佛諸法爲菩薩說而無
希取一食之意則雖爲菩薩說而以大乘爲已智
分也然其所止故在本處下劣之心亦未能捨則
樂大而未知進取小而未能捨也大迦葉曰一切

聲聞聞菩薩不可思議解脫法門皆應號泣聲震
三千大千世界一切菩薩應大欣慶頂受此法蓋
樂大耻小之意也復經少時父知子意漸以通泰
成就大志自鄙先心則我見佛子志求佛道而自
奮起也臨命終時而命其子并會親族國王大臣
刹利居士皆悉已集則涅槃時至人天大集將說
法華之時也卽自宣言此是我子我之所生於某
城中捨吾逝逝踰嶺嶺嶺辛苦五十餘年則欲界色界
無色界失其本願生死五濁之久也其本字某我
名某甲則或字外道或字凡夫我某須陀洹乃至
阿羅漢昔在本城懷憂推覓忽於此間遇會得之

則方在五濁而不得度乃於此經聞而信解也此
實我子我實其父則既聞法已受記作佛令紹大
位也今我所有一切財物皆是子有先所出內是
子所知則付以法藏之意也親族則會中諸菩薩
并八部國王盖十方諸佛之來集者大臣刹利居
士則十方菩薩之侍佛者皆於此經自然見如是
事也

世尊是時窮子聞父此言卽大歡喜得未曾有而作
是念我本無心有所希求今此寶藏自然而至世尊
大富長者則是如來我等皆似佛子如來常說我等
爲于世尊我等以三苦故於生死中受諸熱惱迷惑

無知樂著小法今日世尊令我等思惟蠲除諸法戲
論之糞

論曰我本無心有所希求則是法非思量分別之
所能解因不以心求故今此寶藏自然而至則諸
佛之道有時自現非從人得也傳曰百工居肆以
成其事君子學以致其道莫之求而自至斯以爲
致也歟須菩提等以喻自明佛無難曉者然不若
佛於弟子喻所難知所以喻中雖詳合喻甚略故
捨父逃逝求子中止行到父舍思子委付等四種
喻但以條而合之可也以三苦者五蘊所成之趣
旨無明緣行以至六入爲行苦觸爲苦苦餘爲壞

苦迷惑無知故言遙見疾走也樂著小法故言急
追驚怖也故今隨意密遣二使方便得近苦言勉
進也四種喻其文雖多要皆令思惟除糞之意故
總以一條合之諸法從本來常清淨常寂滅相一
念不生是爲真滅卽無糞可除而二乘執以爲有
是名戲論之糞以有思惟欲蠲除之而思惟心竟
非已物則如人傭力取直而已所作之功亦非已
有也

我等於中勤加精進得至涅槃一日之價旣得此已
心大歡喜自以爲足便自謂言於佛法中勤精進故
所得弘多然世尊先知我等心著弊欲樂於小法便
見縱捨不爲分別汝等當有如來知見寶藏之分世
尊以方便力說如來智慧我等從佛得涅槃一日之
價以爲大得於此大乘無有志求我等又因如來智
慧爲諸菩薩開示演說而自於此無有志願所以者
何佛知我等心樂小法以方便力隨我等說而我等
不知真是佛子今我等方知世尊於佛智慧無所怯
惜所以者何我等昔來真是佛子而但樂小法若我
等有樂大之心佛則爲我說大乘法於此經中唯說
一乘而昔於菩薩前毀塔聲聞樂小法者然佛實以
大乘教化是故我等說本無心有所希求今法王大
寶自然而至如佛子所應得者皆已得之爾時摩訶

迦葉欲重宣此義而說偈言

我等今日聞佛音教歡喜踊躍得未曾有佛說聲聞
當得作佛無上寶聚不求自得譬如童子幼稚無識
捨父逃逝遠到他土周流諸國五十餘年其父憂念
四方推求求之既疲頓止一城造立舍宅五欲自娛
其家巨富多諸金銀碑礫瑪瑙真珠琉璃象牙馬牛羊
輦輿車乘田業童僕人民衆多出入息利乃遍他國
商估賈人無處不有千萬億衆圍繞恭敬常爲王者
之所愛念羣臣豪族皆共宗重以諸緣故往來者衆
豪富如是有大力勢而年朽邁蓋憂念子夙夜惟念
死時將至癡子捨我五十餘年庫藏諸物當如之何

尔時窮子求索衣食從邑至邑從國至國或有所得
或無所得飢餓羸瘦體生瘡癬漸次經歷到父住城
傭賃展轉遂至父舍尔時長者於其門內施大寶帳
處師子座眷屬圍繞諸人侍衛或有計算金銀寶物
出內財產注記券疏窮子見父豪貴尊嚴謂是國王
若國王等驚怖自怪何故至此覆自念言我若久住
或見逼迫強驅使作思惟是已馳走而去借問貧里
欲往傭作長者是時在師子座遙見其子默而識之
卽勅使者追捉將來窮子驚喚迷悶躡地是人執我
必當見殺何用衣食使我至此長者知子愚癡狹劣
不信我言不信是父卽以方便更遣餘人眇目矬陋

無威德者汝可語之云當相雇除諸糞穢倍與汝價
窮子聞之歡喜隨來爲除糞穢淨諸房舍長者於牖
常見其子念子愚劣樂爲鄙事於是長者著弊垢衣
執除糞器往到子所方便附近語令勤作旣益汝價
并塗足油飲食充足薦席厚煖如是苦言汝當勤作
又以軟語若如我子長者有智漸令入出經二十年
執作家事示其金銀真珠玻瓈諸物出入皆使令知
猶處門外止宿草菴自念貧事我無此物父知子心
漸已曠大欲與財物卽聚親族國王大臣刹利居士
於此大衆說是我子捨我他行經五十歲自見子來
已二十年昔於其城而失是子周行求索遂來至此

凡我所有舍宅人民悉以付之恣其所用子念昔貧
志意下劣今於父所大獲珍寶并及舍宅一切財物
甚大歡喜得未曾有佛亦如是知我樂小未曾說言
汝等作佛而說我等得諸無漏成就小乘聲聞弟子
佛勅我等說最上道修習此者當得成佛我承佛教
爲大菩薩以諸因緣種種譬喻若干言辭說無上道
諸佛子等從我聞法日夜思惟精勤修習是時諸佛
卽授其記汝於來世當得作佛一切諸佛秘藏之法
但爲菩薩演其實事而不爲我說斯真要如彼窮子
得近其父雖知諸物心不希取我等雖說佛法寶藏
自無志願亦復如是我等內滅自謂爲足唯了此事

更無餘事我等若聞淨佛國土教化衆生都無欣樂
所以者何一切諸法皆悉空寂無生無滅無大無小
無漏無爲如是思惟不生喜樂我等長夜於佛智慧
無貪無著無復志願而自於法謂是究竟我等長夜
修習空法得脫三界苦惱之患住最後身有餘涅槃
佛所教化得道不虛則爲已得報佛之恩我等雖爲
諸佛子等說菩薩法以求佛道而於是法永無願樂
導師見捨觀我心故初不勸進說有實利如富長者
知子志劣以方便力柔伏其心然後乃付一切財物
佛亦如是現希有事知樂小者以方便力調伏其心
乃教大智我等今日得未曾有非先所望而今自得

如彼窮子得無量寶世尊我今得道得果於無漏法
得清淨眼我等長夜持佛淨戒始於今日得其果報
法王法中久修梵行今得無漏無上大果我等今者
真是聲聞以佛道聲令一切聞我等今者真阿羅漢
於諸世間天人魔梵普於其中應受供養世尊大恩
以希有事憐愍教化利益我等無量億劫誰能報者
手足供給頭頂禮敬一切供養皆不能報若以頂戴
兩肩荷負於恒沙劫盡心恭敬又以美膳無量寶衣
及諸卧具種種湯藥牛頭栴檀及諸珍寶以起塔廟
寶衣布地如斯等事以用供養於恒沙劫亦不能報
諸佛希有無量無邊不可思議大神通力無漏無爲

諸法之王能爲下劣忍于斯事取相凡夫隨宜爲說
諸佛於法得最自在知諸衆生種種欲樂及其志力
隨所堪任以無量喻而爲說法隨諸衆生宿世善根
又知成熟未成熟者種種籌量分別知已於一乘道
隨宜說三

論曰於此文以下以辭合法故詳略不等如我等
於中勤加精進則合汝常作時無有欺怠瞋恨怨
言也得至涅槃一日之價則合更與作字名之爲
兒也旣得此已心大歡喜自以爲足便自謂言於
佛法中勤精進故所得弘多則合窮于雖欣此過
然世尊先知我等心著弊欲樂於小法便見縱捨

不爲分別汝等當有如來知見寶藏之分則合猶
故自謂客作賤人二十年中常令除糞也世尊以
方便力說如來智慧謂對三乘說大乘法如大般
若維摩等經則合心相體信入出無難也我等從
佛得涅槃一日之價以爲大得於此大乘無有志
求則合然其所止猶在本處也我等又因如來智
慧爲諸菩薩開示演說則合其中多少所應取與
汝悉知之卽受教勅令知庫藏所以者何佛知我
等心樂小法以方便力隨我等說而我等不知真
是佛子此再明前義則合下劣之心亦未能捨也
今我等方知世尊於佛智慧無所吝惜而今盡以

法藏付囑故則合一切財物皆是子有也所以者
何我等昔來真是佛子則合此是我子我實其父
而但樂小法若我等有樂大之心佛則爲我說大
乘法也於此經中唯說一乘而昔於菩薩前毀咤
聲聞樂小法者然佛實以大乘教化此再明佛所
以無恠惜之意是故我等說本無心有所希求今
法王大寶自然而至如佛子所應得者皆已得之
此蓋結成無量珍寶不求自得之義也向言無量
珍寶而此言大寶者大寶卽法王之位也得其位
則無量珍寶不求自得如王行則營從隨之則合
今此寶藏自然而至也

無盡居士論曰須菩提摩訶迦葉等本樂空無相
無作之小法忽聞舍利弗受無上正徧正覺之記
於難信難解之法心生信解旣信解已卽能隨宜
譬喻說法遂一心合掌於世尊前說貧子幼稚捨
父逃逝後於父所獲大珍寶以譬所聞希有之法
一心合掌者劉蚪以謂一心則身無異念合掌則
意靡他緣貧子久住他國或二十至五十歲此
則所見所著未離乎十使二見五陰也密遣二人
無威德者雇以除糞二十年中常執此役此則二
乘之法可以除治垢穢也脫上妙服衣弊垢衣此
則觀根而化也子意通泰自鄙先心會親族國王

大臣刹利居士此是我子一切財物皆是子有此則於釋梵沙門婆羅門四衆前授記也

妙法蓮華經合論卷第二

音釋

窶

郎羽切音卑

禪

音但

瘡

愈同 去聲 鞞莫安切

龜

音吾

妙法蓮華經合論卷第三

經 姚秦三藏法師鳩摩羅什 譯

論 宋寶覺圓明禪師惠洪 造

附論 宋丞相無盡居士張商英 撰

妙法蓮華經藥草喻品第五

爾時世尊告摩訶迦葉及諸大弟子善哉善哉迦葉善說如來真實功德誠如所言如來復有無量無邊阿僧祇功德汝等若於無量億劫說不能盡迦葉當知如來是諸法之王若有所說皆不虛也於一切法以智方便而演說之其所說法皆悉到於一切智地論曰佛言如來方便知見之力者解迷遣惑之智

也然必因言以發之衆生迷惑如欲渡而不知津者聞佛言教如得筏而獲濟旣獲濟矣筏則當弃金剛般若經曰汝等比丘知我說法如筏喻者法尚應捨何況非法法尚應捨者捨筏也然凡夫二乘愛見因緣種種戲論隨佛所說而生執著聞其說有則起有見聞其說無則墮斷見不知所以說有滅斷見故所以說無滅有見故如經初說火宅之喻非但較量三乘亦以對治凡夫欣求天人妙果之執也又說窮子之喻非但親近隨順亦以對治二乘有學起自所乘與佛乘等不復更求之執也又爲已信大乘者特起唯一佛乘元無二乘之

執也於是佛乃今爲說一雨所潤三草二木便知有三乘之異而佛所說之法平等則無異也故經言如來是諸法之王若有所說皆不虛也皆不虛猶言皆有以不虛發也如人遠託異國俱其僮僕來歸故鄉道路脩阻經歷險艱疲劣者爲減負載健捷者爲增輜重逗留城邑者勸發其進是人於諸服役施其方便豈有他哉欲其疾至故鄉耳故經言於一切法以智方便而演說之其所說法皆悉到於一切智地

如來觀知一切諸法之所歸趣亦知一切衆生深心所行通達無礙又於諸法究盡明了示諸衆生一切智慧

論曰中觀偈曰諸法不自生亦不從他生不共不
無因是故說無生若言自生心豈復生心若言他
生自尚無體寧曰有他若言共生自他俱無以何
爲共若言無因生者有因且不言生况復無因如
是推求四者皆無系屬卽證無生無生卽唯心所
現心爲諸法之所會故經言如來觀知一切諸法
之所歸趣者以此凡夫以天人之樂爲求二乘以
禪悅之樂爲求菩薩以六度萬行之樂爲求佛洞
見諸三乘人種種心行而能隨其所欲解脫成就
故經言亦知一切衆生深心所行通達無礙者以
此又於諸法究盡明了者疊前歸趣之義斷是一

心示諸衆生一切智慧者疊前通達無礙之義知
是智慧

迦葉譬如三千大千世界山川溪谷土地所生卉木
叢林及諸藥草種類若干名色各異

論曰三千大千世界同爲一地而山川高下谿谷
險邃以譬同一佛土而有三界等故諸趣苦惱之
異然卉木叢林及諸藥草一地所生而種性若干
名色差別以譬法性本一而有天人三乘菩薩之
殊卉則有叢木則有林藥則出於卉木而獨言草
者以譬天人三乘對菩薩爲小耳種則種子類則
族類名則稱謂色則形相以譬天人三乘菩薩根

性伴助名狀體號亦有差別也

密雲彌布遍覆三千大千世界一時等澍其澤普洽
卉木叢林及諸藥草小根小莖小枝小葉中根中莖
中枝中葉大根大莖大枝大葉諸樹大小隨上中下
各有所受一雲所雨稱其種性而得生長華果敷實
雖一地所生一雨所潤而諸草木各有差別

論曰密雲彌布遍覆三千大千世界以譬如來出
世以大音聲普遍沙界天人阿脩羅衆一時等澍
其澤普洽以譬雨大法雨無不充足卉木叢林及
諸藥草根莖枝葉隨求所受之小大而滋茂之以
一切衆生種性體相好樂欣慕之不等一雲所雨

稱其種性而得生長華果敷實以譬一音說法隨
類得解任力所能而成道果雖一地所生一雨所
潤而諸草木各有差別以譬衆生俱是一相一味
之法而有天人三乘菩薩之差種性卽上根莖偈
又言如其體相卽上枝葉皆互相見華果敷實言
華敷果實亦欲錯以成文耳

迦葉當知如來亦復如是出現於世如大雲起以大
音聲普遍世界天人阿脩羅如彼大雲遍覆三千大
千國土於大衆中而唱是言我是如來應供正徧知
明行足善逝世間解無上士調御丈夫天人師佛世
尊未度者今度未解者今解未安者今安未涅槃者

今得涅槃今世後世如實知之我是一切知者一切見者知道者開道者說道者汝等天人阿脩羅衆皆應到此爲聽法故爾時無數千萬億種衆生來至佛所而聽法如來于時觀是衆生諸根利鈍精進懈怠隨其所堪而爲說法種種無量皆令歡喜快得善利是諸衆生聞是法已現世安隱後生善處以道受樂亦得聞法旣聞法已離諸障礙於諸法中任力所能漸得入道如彼大雲雨於一切卉木叢林及諸藥草如其種性具足蒙潤各得生長

論曰智度論曰師子坐必踞卧必右脇日唯一食累足而卧以其筋爲絃彈之他絃皆絕以其乳滴

驢乳中皆化爲血生三歲卽能哮吼百獸怖懼其種性猛利而無所畏也佛號人中師子者以於諸法得無所畏故經言於大衆中唱如是言我是如來乃至我是一切知者一切見者知道者開道者說道者噫於大菩薩天人阿脩羅衆之前有所畏者能如是乎此哮吼之聲也經言隨其所堪而爲說法者隨其住趣而免苦厄是謂現世安隱由惡趣而生人天由人天而生佛國是謂後生善處或以十善道或以四諦法或以十二因緣或以六波羅蜜以自娛樂是謂以道受樂於所生處復得見佛聞所未聞是謂亦得聞法則人天當斷事障以

入二乘菩薩之道二乘菩薩當斷理障以入菩薩之道是謂離諸障礙於諸法中任力所能漸得入道此皆佛自以法合其所喻故經言如彼大雲雨於一切卉木叢林及諸藥草如其種性具足蒙潤各得生長

如來說法一相一味所謂解脫相離相滅相究竟至於一切種智

論曰捨外塵邪執得意言分別意言分別猶爲識想捨唯識想得真法界真法界是爲智境經言如來所說法一相一味者顯發智境無假法者智境既無假法則是解脫何必言解脫相邪曰以華嚴

論曰一切衆生現行無明卽是如來根本大智故然智體清淨而能容受一切智體旣言能容受一切則是離何必言離相邪曰以首楞嚴經曰譬如虛空體非群象而不礙彼諸相發揮故以智性無性不妨緣起無生智性旣言不妨緣起無生則是滅何必言滅相邪曰以維摩經曰不生不滅是無常義然則何謂究竟至於一切種智乎曰前三義以相言者所謂智相至於窮極則猶名種種智種智者心相也以是微細念故起信論曰遠離微細念故得見心性自是而觀則智與得猶爲障礙而不自在般若經曰無智亦無得以無所得故菩提薩

唾

其有衆生聞如來法若持讀誦如說修行所得功德不自覺知所以者何唯有如來知此衆生種相體性念何事思何事修何事云何念云何思云何修以何法念以何法思以何法修以何法得何法衆生住於種種之地唯有如來如實見之明了無礙如彼卉木叢林諸藥草等而不自知上中下性如來知是一相一味之法所謂解脫相離相滅相究竟涅槃常寂滅相終歸於空佛知是已觀衆生心欲而將護之是故不卽爲說一切種智汝等迦葉甚爲希有能知如來隨宜說法能信能受所以者何諸佛世尊隨宜說法

難解難知

論曰如凡夫聞佛所說則念惡趣之苦思所由濟修十善道希天人之果二乘則念捨煩惱趣寂滅生之苦思起大悲修六波羅蜜希登無上正等正覺而凡夫二乘及諸菩薩所得功德則不自覺知其材之大小性之美惡但濯濯然而密茂欣欣然而敷榮而已而佛能盡知之故經言唯有如來如實見之明了無礙以合一雲之布一雨之潤也故又言如來知是一相一味之法問曰所謂解脫相離相滅相皆疊前三義於此變一切種智之名爲

究竟涅槃常寂滅相而特言終歸於空何也曰佛之方便難解難知然亦時見其端夫法之一相一味則是解脫解脫卽是離離則是滅而必言相者豈非爲對三乘說知其根性之殊遮之而言相也歟如下文曰佛知是已觀衆生心欲而將護之是故不卽爲說一切種智護之猶言遮之也又問曰審如所言則卒明告曰終歸於空何也曰先以方便遣其執執盡矣則見自亡譬如磨鏡垢盡明現鏡垢已盡則明非外來執盡見亡則雖不言終歸於空亦可然根性未熟則遮之旣已純熟則明告法施之式如此

爾時世尊欲重宣此義而說偈言

破有法王出現世間隨衆生欲種種說法如來尊重智慧深遠久默斯要不務速說有智若聞則能信解無智疑悔則爲未失是故迦葉隨力爲說以種種緣令得正見

論曰首楞嚴經曰空生大覺中如海一漚發又曰一人發真歸源十方虛空悉皆消殞然則虛空亦生滅法也顯此虛空必由色法該諸色法總名爲有蓋甞深觀之有若真實則不可破不可破則空有不遍之處何以故以真實有體爲間礙故有若可破則非真實旣非真實則便可言無何必更名

破有哉曰論必有旨也言破以明有非實有言有以明空非斷空故經言破有法王出現世間有之字從月月無光光之者日也從又又手也執而有之凡有如此舊疏曰有者卽三有也能破一有謂三界爲一業有之所有故或破二有謂本有中有一故或破三有卽是三界故誤矣

迦葉當知譬如大雲起於世間徧覆一切慧雲含潤電光晃曜雷聲遠震令衆悅豫日光掩蔽地上清涼發黶垂布如可承攬其雨普等四方俱下流澍無量率土充洽山川險谷幽邃所生卉木藥草大小諸樹百穀苗稼甘蔗蒲葇雨之所潤無不豐足乾地普洽

藥木並茂其雲所出一味之水草木叢林隨分受潤一切諸樹上中下等稱其大小各得生長根莖枝葉華果光色一雨所及皆得鮮澤如其體相性分大小所潤是一而各滋茂佛亦如是出現於世譬如大雲普覆一切既出于世爲諸衆生分別演說諸法之實大聖世尊於諸天人一切衆中而宣是言我爲如來兩足之尊出於世間猶如大雲充潤一切枯槁衆生皆令離苦得安隱樂世間之樂及涅槃樂諸天人衆一心善聽皆應到此觀無上尊我爲世尊無能及者安隱衆生故現於世爲大衆說甘露淨法其法一味解脫涅槃以一妙音演暢妙義常爲大乘而作因緣

我觀一切普皆平等無有彼此愛憎之心我無貪著亦無限礙恒爲一切平等說法如爲一人衆多亦然常演說法曾無他事去來坐立終不疲厭充足世間如兩普潤貴賤上下持戒毀戒威儀具足及不具足正見邪見利根鈍根等雨法雨而無懈倦一切衆生聞我法者隨力所受住於諸地或處人天轉輪聖王釋梵諸王是小藥草知無漏法能得涅槃起六神通及得三明獨處山林常行禪定得緣覺證是中藥草求世尊處我當作佛行精進定是上藥草又諸佛子專心佛道常行慈悲自知作佛決定無疑是名小樹安住神通轉不退輪度無量億百千衆生如是菩薩

名爲大樹佛平等說如一味雨隨衆生性所受不同如彼草木所稟各異佛以此喻方便開示種種言辭演說一法於佛智慧如海一滴我雨法雨充滿世間一味之法隨力修行如彼業林藥草諸樹隨其大小漸增茂好諸佛之法常以一味令諸世間普得具足漸次修行皆得道果聲聞緣覺處於山林住最後身聞法得果是名藥草各得增長若諸菩薩智慧堅固了達三界求最上乘是名小樹而得增長復有住禪得神通力聞諸法空心大歡喜放無數光度諸衆生是名大樹而得增長如是迦葉佛所說法譬如大雲以一味雨潤於人華各得成實迦葉當知以諸因緣

種種譬喻開示佛道是我方便諸佛亦然今爲汝等
說最實事諸聲聞衆皆非滅度汝等所行是菩薩道
漸漸修學悉當成佛

論曰經言密雲彌布遍復三千大千世界故偈中
言之曰迦葉當知譬如大雲起於世間遍覆一切
便言慧雲含潤何也曰慧雲以譬應身以能具微
塵沙數修多羅教故言含潤又應身皆智之光如
電故言是曜修多羅教曰文身向身向身皆慧之
辯如雷故言遠震使九十五種邪光不現故言掩
蔽除九十八種熱惱故言清涼然以此身現于世
間示同三有雖可卽之而不可取故言如可承攬

舊疏曰慧雲含潤者慈心龍所起之雲此龍將施
雨必先七日布以雲陰候衆事辦乃雨故稱含潤
審如疏所論則經乃不言慈雲而言慧雲邪夫佛
應身全是智慧故

無盡居士論曰須菩提既說貧子喻摩訶迦葉重
說偈世尊稱其能信能受然而先愚後智先貧後
富先失後得先迷後悟未能盡知如來無量無邊
阿僧祇功德故又示之以一相一味之法譬如大
雲遍覆一切則孰爲先後孰爲廣狹電光是曜劉
虬所謂類應身之顯知見雷聲遠震劉虬所謂類
應身之發鴻唱其兩普等四方俱下其雲所出一

味之水者以明解脫相離相滅相究竟涅槃相常寂滅相何法不爾卉木藥草上中下樹各得生長根莖枝葉各得滋茂潤於人華各得成實生長之茂盛之成實之所稟各異所潤是同斯則無一趣而不攝無一類而不度無一法而不周非若貧子得財之喻鄙先心而存二見也

妙法蓮華經授記品第六

爾時世尊說是偈已告諸大眾唱如是言我此弟子摩訶迦葉於未來世當得奉覲三百萬億諸佛世尊供養恭敬尊重讚歎廣宣諸佛無量大法於最後身得成爲佛名曰光明如來應供正徧知明行足善逝

世間解無上士調御丈夫天人師佛世尊國名光德劫名大莊嚴佛壽十二小劫正法住世二十小劫像法亦住二十小劫國界嚴飾無諸穢惡瓦礫荆棘便利不淨其土平正無有高下坑坎堆阜瑠璃爲地寶樹行列黃金爲繩以界道側散諸寶華周徧清淨其國菩薩無量千億諸聲聞衆亦復無數無有魔事雖有魔及魔民皆護佛法爾時世尊欲重宣此義而說偈言

告諸比丘我以佛眼見是迦葉於未來世過無數劫當得作佛而於來世供養奉覲三百萬億諸佛世尊爲佛智慧淨修梵行供養最上二足尊已修習一切

無上之慧於最後身得成爲佛其土清淨瑠璃爲地
多諸寶樹行列道側金繩界道見者歡喜常出好香
散衆名華種種奇妙以爲莊嚴其地平正無有丘坑
諸苦薩衆不可稱計其心調柔逮大神通奉持諸佛
大乘經典諸聲聞衆無漏後身法王之子亦不可計
乃以天眼不能數知其佛當壽十二小劫正法住世
二十小劫像法亦住二十小劫光明世尊其事如是
論曰迦葉號大迦葉者青年於衆中身光吞飲一
由旬佛稱其慈悲禪定神通三昧之力與我同嘗
分座使之坐故以爲大也始於跋耆聚落見佛獻
寶衣佛以糞掃衣授與囑曰此大衣大聖所衣無

以麤重生怠想迦葉曰當作師想塔想不敢首莫
矧覆卧邪何以故此衣大進我行故佛以維摩詰
卧疾毗耶離城令往問疾迦葉曰我不堪往也憶
念我昔於貧里行乞時偶遇見之謂我言有慈悲
心而不能普捨豪富從貧乞迦葉住平等法應次
行乞食不爲食故應行乞食爲壞和合相故應取
其食爲不受故應受食以空聚想入於聚落所見
色與盲等所聞聲與響等所嗅香與風等所食味
不分別受諸觸如智證知諸法如幻相無自性無
他性本自不然今則無滅迦葉若能不捨八邪入
八解脫以邪相入正法以一食施一切供養諸佛

及衆聖賢然後可食如是食者非有煩惱非離煩惱非入定意非起定意非住世間非住涅槃其施者無大福無小福不爲益不爲損是爲正入佛道不依聲聞迦葉若如是食爲不空食人之施也我時得未曾有佛聞此語亦不強之行佛將入滅以法付之曰汝能爲一切衆生作依止如我在世有頭陀行如汝我法則存不然法則滅汝真荷擔大法者付法竟乃般涅槃諸天請結集法藏以偈讚曰耆年欲恚慢已除其形譬如紫金聚上下端巖妙無比目脩清淨如青蓮結集畢登忉利天禮佛髮塔爲諸天人說法曰爲善生天爲惡入淵五欲

無常如華上露見日則晞於是諸天爲泣下良久問曰大迦葉何爲披此抖擻邪曰妙衣求時苦得時復畏失旣失又生惱此衣糞掃之餘無此過非多畜則有浣縫負載之勞故甘被一衲也又問曰何爲常乞不受食邪曰受食有僧事役故乞食殘食小食擾動喪時故一食多食難消生睡故少食飢劣乏力故應量食食器多持滌費功故一鉢食飲多數起故不飲又問曰何爲不時經行而長坐邪曰舍宇今人生著故止於樹下樹下久復然去居塚間又起悲憂皆妨道乃露地而休卽便欲卧卧則增懶故常坐耳言訖乃去諸天歎曰里巷寒

駸苦厄羸劣貧窮孤露彼常憐愍今弃而去誰覆
護我哉佛在世時比丘有問者曰大迦葉身光剎
浮那陀金色不及此金在濁水光徹波上何修而
臻此乎佛曰毗婆尸佛時迦葉爲鍛師有貧女見
塔像壞丐金使鍛修飾之因喜約爲夫婦九十一
劫人中天上身常金色今佛授記當作佛佛號光
明國名光德蓋其因地所致然也
爾時大目犍連須菩提摩訶迦旃延等皆悉懷懼一
心合掌瞻仰尊顏目不甞捨卽共同聲而說偈言
大雄猛世尊諸釋之法王哀愍我等故而賜佛音聲
若知我深心見爲授記者如以甘露灑陰熱得清涼

如從饑國來忽遇大王膳心猶懷疑懼未敢卽便食
若復得王教然後乃敢食我等亦是每惟小乘過
不知當云何得佛無上慧雖聞佛音聲言我等作佛
心常懷憂懼如未敢便食若蒙佛授記爾乃快安樂
大雄猛世尊常欲安世間願賜我等記如饑須教食
爾時世尊知諸大弟子心之所念告諸比丘是須菩
提於當來世奉覲三百萬億那由他佛供養恭敬尊
重讚歎常修梵行具菩薩道於最後身得成爲佛號
曰名相如來應供正徧知明行足善逝世間解無上
士調御丈夫天人師佛世尊劫名有寶國名寶生其
土平正玻瓈爲地寶樹莊嚴無諸丘坑沙礫荆棘便

利之穢寶華覆地周徧清淨其土人民皆處寶臺玳
妙樓閣聲聞弟子無量無邊筭譬喻所不能知諸
菩薩衆無數千萬億那由他佛壽十二小劫正法住
世二十小劫像法亦住二十小劫其佛常處虛空爲
衆說法度脫無量菩薩及聲聞衆爾時世尊欲重宣
此義而說偈言

諸比丘衆今告汝等皆當一心聽我所說我大弟子
須菩提者當得作佛號曰名相當供無數萬億諸佛
隨佛所行漸具大道最後身得三十二相端正姝妙
猶如寶山其佛國土嚴淨第一衆生見者無不愛樂
佛於其中度無量衆其佛法中多諸菩薩皆悉利根
轉不退輪彼國常以菩薩莊嚴諸聲聞衆不可稱數
皆得三明具六神通住八解脫有大威德其佛說法
現於無量神通變化不可思議諸天人人民數如恒沙
皆共合掌聽受佛語其佛當壽十二小劫正法住世
二十小劫像法亦住二十小劫

論曰須菩提者性慈順敬愛常修空行入空定住
無諍三昧樂於閑林石窟燕默而坐有來親近者
爲剖析空義衆生供養必獲現報故號善善然能
護衆生意不令生念礙謂如不欲其行卽住不欲
其住卽行無事於去留佛坐夏切利天夏休下降
人間億萬之衆爭先願見蓮華色比丘尼犯衆接

足而禮時須菩提方端坐石室念諸法空曰色非
佛乃至識非佛眼非佛乃至意非佛豁然而悟佛
語蓮華色比丘尼非汝先見我須菩提乃先見我
也蓮華色比丘尼白佛曰何爲乃尔倒植邪佛曰
汝禮我色身須菩提則見我法身也佛嘗遣詣維
摩詰所問疾須菩提曰我不堪往也憶念我昔入
其舍從乞食維摩詰取我鉢盛滿飯謂我言若能
於食等者諸法亦等諸法等者於食亦等如是行
乞乃可取食若須菩提不斷媯怒癡亦不與俱不
壞於身而隨一相不滅癡愛起於明脫以五逆相
而得解脫亦不解亦不縛不見四諦非不見諦非

得果非凡夫非離凡夫法非聖人非不聖人雖成
就一切法而不離諸法相乃可取食若須菩提不
見佛不聞法彼外道六師富蘭那迦葉末伽梨賒
梨子刪闍夜毗羅胝子阿耆多翅舍欽婆羅迦羅
鳩馱迦旃延尼犍陀若提子等是汝之師因其出
家彼師所墮汝亦隨墮乃可取食若須菩提入諸
邪見不到彼岸住於八難不得無難同於煩惱離
清淨法汝得無諍三昧一切衆生亦得是定其施
汝者不名福田供養汝者墮三惡道爲與衆魔共
一手作諸勞侶汝與衆魔及諸塵勞等無有異於
一切衆生而有怨心謗諸佛毀於法不入衆數終

不得滅度汝若如是乃可取食時我世尊聞此茫然不識是何言不知以何答便置鉢欲出其舍維摩詰曰取鉢勿懼於意云何如來所作化人若以是事詰寧有懼不我言不也維摩詰曰一切諸法如幻化相汝今不應有所懼也所以者何一切言說不離是相至於智者不著文字故無所悸也何以故文字性離無有文字是則解脫解脫者則諸法也是不堪彼佛默然而止初須菩提生時家諸倉庫器皿皆空又平生修空行說空法今授記作佛佛號名相國名寶生觀其因地以空法而至果位則名相與寶蓋有爲法也因空果有其亦顯

發無住義故

爾時世尊復告諸比丘衆我今語汝是大迦旃延於當來世以諸供具供養奉事八千億佛恭敬尊重諸佛滅後各起塔廟高千由旬縱廣正等五百由旬以金銀瑠璃碑磔瑪瑙真珠玫瑰七寶合成衆華瓔珞塗香末香燒香繒蓋幢幡供養塔廟過是已後當復供養二萬億佛亦復如是供養是諸佛已具菩薩道當得作佛號曰闍浮那提金光如來應供正遍知明行足善逝世間解無上士調御丈夫天人師佛世尊其土平正玻瓈爲地寶樹莊嚴黃金爲繩以界道側妙華覆地周徧清淨見者歡喜無四惡道地獄餓鬼

畜生阿脩羅道多有天人諸聲聞衆及諸菩薩無量
萬億莊嚴其國佛壽十二小劫正法住世二十小劫
像法亦住二十小劫爾時世尊欲重宣此義而說偈言
諸比丘衆皆一心聽如我所說真實無異是迦旃延
當以種種妙好供具供養諸佛諸佛滅後起七寶塔
亦以華香供養舍利其最後身得佛智慧成等正覺
國土清淨度脫無量萬億衆生皆爲十方之所供養
佛之光明無能勝者其佛號曰閻浮金光菩薩聲聞
斷一切有無量無數莊嚴其國

論曰迦旃延者有慧辯善說法要於大衆中以解
義稱第一嘗宴坐樹下有外道來作禮問曰以我

觀世人但有此世更無他世可得然乎迦旃延曰
今此日月爲天爲人爲此世爲他世邪若無他世
則無日月矣外道俛首良久曰我見人死無有還
者知無他世也曰如有罪者被囚寧得還邪又問
曰若死者生天何不歸乎曰如人墮廁得出寧肯
復入廁邪且上天一日人間百年彼生未終日而
汝骨已壞寧能知之乎又問曰我以罪人鑊煮之
不見其神出故知無他世也曰汝晝睡時傍人有
見汝神出游者乎又問曰我以人鬻肉粉骨求神
竟無有故知無他世也曰如人折薪寸斷之寧有
火可得邪又問曰我以人秤之皆輕於死者若神

去應輕而反重故知無他世也曰凡鐵在火則輕
出火則重人生有神則輕既死失其神則重何以
異此乎又問曰我以將死者爲那求神不可得故
知無他世也曰汝聞貝聲寧能利那求得之邪於
是外道慘悴而言曰汝種種破壞我所執然我執
此久竟未忍捨之奈何迦旃釁笑曰汝見採糶者
手採糶而見麻卽取麻捨糶勝人之情也汝獨
不欲尔邪又問曰衆人所見皆然非也汝見女人
汝豈得專以我爲非乎曰昔有一人同舍見鬼於
曰君牛人俱健前卽豐草茂穀處更載芻米何益
哉一人聞其語卽弃芻米一人曰我見豐草茂穀

處乃弃之前弃芻米者行三日飢無所得爲鬼所
嗽衆人所見者如鬼詒汝也而汝不受我語如弃
芻米也外道者伏地扣頭曰我不能捨我所所執
更復見難當大瞋怒也曰我非難汝但記昔有人
家畜猪多因行見路旁糞收置笥頂戴而歸中途
遇雨穢液流面路人勸其疾弃之其人恚曰汝家
不養猪邪正汝類也於是外道屈伏歎曰我始聞
日月之論則已解但欲深聞智辯故敢喋妙哉大
士善開迷雲也佛嘗遣詣維摩詰問疾卽白佛言
我不堪往憶念我昔因佛爲諸比丘略說法要我
卽於後敷演之謂無常義苦義空義無我義寂滅

義時維摩詰來謂我言無以生滅心行說實相法
迦旃延諸法畢竟不生不滅是無常義五受陰洞
達空無所起是苦義諸法究竟無所有是空義於
我無我而不二是無我義法本不生今則無滅是
寂滅義以是故不堪行迦旃延之辯能折外道而
不能逃維摩詰之訶大乘二乘之宗異故然今佛
授記當作佛佛號閻浮那提金光而但曰其土不
言國名豈非義無量而名不足以盡之邪

爾時世尊復告大眾我今語汝是大目犍連當以種
種供具供養八千諸佛恭敬尊重諸佛滅後各起塔
廟高千由旬縱廣正等五百由旬以金銀琉璃碾磑

瑪瑙真珠玫瑰七寶合成衆華瓔珞塗香末香燒香
繒蓋幢幡以用供養過是已後當復供養二百萬億
諸佛亦復如是當得成佛號曰多摩羅跋耨檀香如
來應供正徧知明行足善逝世間解無上士調御丈
夫天人師佛世尊劫名喜滿國名喜樂其土平正玻
璃爲地寶樹莊嚴散直珠華周徧清淨見者歡喜多
諸天人菩薩聲聞其數無量佛壽二十四小劫正法
住世四十四小劫像法亦住四十四小劫爾時世尊欲重
宣此義而說偈言

我此弟子大目犍連捨是身已得見八千二百萬億
諸佛世尊爲佛道故供養恭敬於諸佛所嘗修梵行

於無量劫奉持佛法諸佛滅後起七寶塔長表金刹
華香伎樂而以供養諸佛塔廟漸漸具足菩薩道已
於意樂國而得作佛號多摩羅栴檀之香其佛壽命
二十四劫常爲天人演說佛道聲聞無量如恒河沙
三明六通有大威德菩薩無數志固精進於佛智慧
皆不退轉佛滅度後正法當住四十小劫像法亦爾
我諸弟子威德具足其數五百皆當授記於未來世
咸得成佛我及汝等宿世因緣吾今當說汝等善聽
論曰目犍連號大目犍連者羅夜那名同者多故
以大別之性豪爽矯然出群以神通稱第一佛臨
阿耨池池之龍念曰此衆乃不見舍利弗耶佛勅

目連往祇洹精舍呼之舍利弗方補衲顧見謂目
連曰汝先行我補竟卽去於是目連引手摩其刺
處衣卽成舍利弗以針之餘線置之地曰汝能舉
此乎目連盡其神力不能舉自疑失其神通又促
之乃去以屈伸臂頃至佛所舍利弗已在座前矣
有耆域者生忉利天未久目連登天遇諸天出遊
於中途見域乘車不下目連駐之使不得行者域
合爪謝曰我受天樂方美未暇謁尊者也車乃得
行因入天宮宮女皆逃羞目連念其著樂火其宮
殿令崩壞乃爲帝釋說法帝釋喜俄金碧樓觀儼
如故佛梵音無極目連戲尋其音盡其神力西過

恒河沙國土梵音尚在耳邊至一國值比丘衆方
食目連息其力登食鉢之上經行衆大驚曰何從
得此人頭蟲耶彼佛曰此蓋東方無量佛土釋迦
牟尼佛神足弟子尋聲至此耳佛嘗遣詣維摩詰
所問疾卽白佛曰我不堪往也憶念昔入毗耶離
城爲諸居士說法時維摩詰謂我言爲白衣說法
不當如仁者所說夫說法者當如法說法無衆生
離衆生垢故法無有我離我垢故法無壽命離生
死故法無有人前後際斷故法常寂然滅諸相故
法離於相無所緣故法無名字言語斷故法無有
說離覺觀故法無形相如虛空故法無戲論畢竟

空故法無有我離我所故法無分別離諸識故法
無有比無相待故法不屬因不在緣故法同法性
入諸法故法隨於如無所隨故法住實際諸邊不
動故法無動搖不依六塵故法無去來常不住故
法順空隨無相應無作離好醜法無增損法無生
滅法無所歸法過眼耳鼻舌身意法無高下法常
住不動法離一切觀行唯大目連法相如是豈可
說乎夫說法者無說無示其聽法者無聞無得譬
如幻士爲幻人說法當建是意而爲說法當了衆
生根有利鈍善於知見無所罣礙以大悲心贊千
大乘念報佛恩不斷三寶然後說法世尊我畏其

辯故不堪任也調達者常引五百比丘爲其徒衆
目連厭之令睡於是調達鼾聲訥訥瞿伽離以脚
蹠之不寤舍利弗爲五百人者說法皆回心歸佛
而調達始欠伸目連以手擊去僧乃得和合今佛
授記當作佛佛號多摩羅跋栴檀香如來劫名喜
滿國名意樂西北方二佛一多摩羅跋栴檀香神
通香神通之譬也然大迦葉所行之因光明故其
果亦光明者證成因果等故須菩提所行之因空
而所得之果不空者顯示無住義故迦旃延所行
之因則分別名相義句而所得果報之境不立名
字蓋發明義理非名字所能盡故大目犍連所行

之因以神通而所得之果號栴檀香示法喻齊故
是四大弟子泛觀其爲象則神通光明法相空寂
也問曰唯授記爲佛決定之說乃以象釋之自非
上根敢逃疑謗乎曰然涅槃經曰若有聞說隨順
樂入速得成佛心生輕賤授以遲記若言佛難得
久受勤苦然後乃成爲此人故授以速記又善根
熟者授以速記善根未熟授以遲記如四大弟子
之得記皆於三百萬億佛而供養之謂四人者善
根未熟聞佛所說獨不隨順樂入可乎維摩詰嘗
謂彌勒菩薩曰世尊授仁者記一生當得阿耨多
羅三藐三菩提爲用何生得受記乎過去邪未來

邪現在邪若過去生已滅若未來生未至若現在
生現在生無住如佛所說比丘汝卽時亦生亦老
亦滅若以無生得記者無生卽是正位於正位中
亦無受記亦無得阿耨多羅三藐三菩提云何彌
勒受一生記乎矣哉維摩詰之言亦可以深觀之
也

無盡居士論曰佛旣以藥草喻爲摩訶迦葉等說
所行是菩薩道漸漸修學悉當成佛修菩薩道必
有其果成佛必有其名佛出必有其劫應劫必有
其國故授記以迦葉於未來世奉觀三百萬億諸
佛供養恭敬尊重讚歎廣宣大法於大莊嚴劫光

德國成佛名曰光明如來十號具足須菩提於當
來世奉觀三百萬億佛供養恭敬尊重讚歎常修
梵行具菩薩道於有寶劫寶生國成佛號曰名相
大迦旃延於當來世以妙好供具奉事八千億佛
又復供養二萬億佛成佛號曰閻浮那提金光大
目連供養恭敬八千二百萬億諸佛於喜滿劫意
樂國成佛號曰多摩羅跋栴檀香我諸弟子其數
五百皆當授記於未來世而成佛夫生老病死苦
人之所大怖畏也無生無老無病無死無苦其惟
修菩薩道成佛乎過去佛日月燈明亦如是見在
佛釋迦世尊亦如是未來佛授記聲聞亦如是然

則佛無生無死而有前佛後佛彼劫此劫彼國此國何也曰虛空無邊世界無邊國土無邊而宿世因緣或在此世界或在彼國土佛於無量無邊浩劫應緣而現釋梵諸天四衆見其滅度而佛實非滅度也見其正法住世像法住世有若干劫而法實無正像也劫實無久近也故於閻浮那提金光佛則但曰成佛而不言其何劫何國例此思之則佛之意深矣

妙法蓮華經化城喻品第七

佛告諸比丘乃往過去無量無邊不可思議阿僧祇劫尔時有佛名大通智勝如來應供正徧知明行足

善逝世間解無上士調御丈夫天人師佛世尊其國名好城劫名大相諸比丘彼佛滅度已來甚大久遠譬如三千大千世界所有地種假使有人摩以爲墨過於東方千國土乃下一點大如微塵又過千國土復下一點如是展轉盡地種墨於汝等意云何是諸國土若筭師若筭師弟子能得邊際知其數不也世尊諸比丘是人所經國土若點不點盡抹爲塵一塵一劫彼佛滅度已來復過是數無量無邊百千萬億阿僧祇劫我以如來知見力故觀彼久遠猶若今日尔時世尊欲重宣此義而說偈言
我念過去世無量無邊劫有佛兩足尊名大通智勝

如人以力摩三千大千土盡此諸地種皆悉以爲墨
過於千國土乃下一塵點如是展轉點盡此諸塵墨
如是諸國土點與不點等復盡抹爲塵一塵爲一劫
此諸微塵數其劫復過是彼佛滅度來如是無量劫
如來無礙智知彼佛滅度及聲聞菩薩如見今滅度
諸比丘當知佛智淨微妙無漏無所礙通達無量劫
論曰大通智勝如來者能證無量義處三昧之佛
也以大通智三字攝三重法界以如來知見力入
三重觀門故又以勝之一字足其義乃言觀於久
遠猶若今日初入真空絕相觀偈曰若人欲識真
空理身內真如還徧外情與無情共一體處處皆

同真法界故經於此言大也次入理事無礙觀偈
曰只用一念觀一境一切諸境同時會於一境中
一切智一切智中諸法界故經於此言通也次入
周徧含容觀偈曰一念照入於多劫一一念劫收
一切時處帝網現重重一切智通無障礙故經於
此言智也以此三重妙觀而入三重法界以顯此
三昧出情離見一切諸三昧無能及者故經於此
言勝也華嚴經曰世尊在摩竭提國阿蘭若法菩
提場中始成正覺於普光明殿入剎那際諸佛三
昧以一切智自在神通力現如來身清淨無礙無
所依止者卽是此大通智勝如來也又曰無有攀

緣住奢摩他最極寂靜者國名好城也以此最極
寂靜住處非化城故又曰具大威德無所染著能
令見者悉得開悟隨宜出興不失於時常住一相
所謂無相者劫名大相也以此一相無相之相非
證空小果故經必言過去滅度者以明其體常寂
滅故必言觀於久遠猶若今日者以明古今不移
一念故

佛告諸比丘大通智勝佛壽五百四十萬億那由他
劫其佛本坐道場破魔軍已垂得阿耨多羅三藐三
菩提而諸佛法不現在前如是一小劫乃至十小劫
結加趺坐身心不動而諸佛法猶不在前今時切利

諸天先爲彼佛於菩提樹下敷師子座高一由旬佛
於此坐當得阿耨多羅三藐三菩提適坐此座時諸
梵天王雨衆天華面百由旬香風時來吹去萎華更
雨新者如是不絕滿十小劫供養於佛乃至滅度常
雨此華四王諸天爲供養佛常擊天鼓其餘諸天作
天技樂滿十小劫至于滅度亦復如是諸比丘大通
智勝佛過十小劫諸佛之法乃現在前成阿耨多羅
三藐三菩提

論曰垂得猶言俄將得也經十小劫結加趺坐身
心不動者禪定三昧也禪定三昧而諸佛法不現
在前何也曰諸佛法不屬禪定三昧何以故智身

無有住處故若有住處則普賢常行之行應有止
息也過十小劫諸佛之法乃得現前成阿耨多羅
三藐三菩提者以明智身出諸功用故何以故以
智身不與一切染法相應故凡微細惑習殊勝禪
定皆是垢淨染法故華嚴論曰成佛果德已後常
行普賢行常處世間十方六道無有休息如十地
道滿欲見普賢行以十地中三昧力倍倍入無量
三昧畢竟不見普賢身及境界普賢菩薩卽智身
也十地道滿以十地中三昧力倍倍入無量三昧
者經十小劫過十小劫之謂也畢竟不見者諸佛
法而不現在前之謂也如論則稱如來常闍會中

一切諸大菩薩求覓普賢不見其身及座佛令各
生想念殷勤三禮普賢菩薩方以神通力如應現
身明智身不可以三昧處求也爲智體無所住無
所依故若生想念願樂卽如應現身無有處所依
止故猶如谷響但有應物之音若呼之則應無有
處所可得故有欲見普賢者但生想念而已

其佛未出家時有十六子其第一者名曰智積諸子
各有種種珠異玩好之具聞父得成阿耨多羅三藐
三菩提皆捨所珍往詣佛所諸母涕泣而隨送之其
祖轉輪聖王與一百大臣及餘百千萬億人民皆共
圍繞隨至道場咸欲親近大通智勝如來供養恭敬

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9
尊重讚歎到已頭面禮足繞佛畢已一心合掌瞻仰
世尊以偈頌曰

大威德世尊爲度衆生故於無量億歲爾乃得成佛
諸願已具足善哉吉無上世尊甚希有一坐十小劫
身體及手足靜然安不動其心常憺怕未曾有散亂
究竟未寂滅安住無漏法今者見世尊安隱成佛道
我等得善利稱慶大歡喜衆生常苦惱盲瞑無導師
不識苦盡道不知求解脫長夜增惡趣滅損諸天衆
從冥入於冥求不聞佛名今佛得最上安隱無漏道
我等及天人爲得最大利是故咸稽首歸命無上尊
爾時十六王子偈讚佛已勸請世尊轉於法輪咸作

是言世尊說法多所安隱怜愍饒益諸天人民重說

偈言

世雄無等倫百福自莊嚴得無上智慧願爲世間說
度脫於我等及諸衆生類爲分別顯示令得是智慧
若我等得佛衆生亦復然世尊知衆生深心之所念
亦知所行道又知智慧力欲樂及修福宿命所行業
世尊悉知已當轉無上輪

論曰唯識論曰眼耳鼻舌身五識及分別事識意
識阿賴耶識爲八種起信論曰依阿賴耶識說有
無明不覺而起能見能現能取境界起念相續故
說爲意此意復有五種名云何爲五一者名爲業

識謂無明力二者名爲轉識依於動心能見相故
三者名爲現識所謂現一切境界猶如明鏡現於
色像現識亦爾隨其五塵對至卽現無有前後以
一時任運而起常在前故四者名爲智識分別染
淨法故五者名爲相續識以念相應不斷故又爲
八種以阿賴耶生滅因緣共十六種皆是衆生生
死之趣十二有支之區宇十明論曰十二緣生者
是一切衆生逐妄迷真隨生死流轉波浪不息之
苦海其海廣大甚深無際亦是一切諸佛聖賢寶
莊嚴大城以此十二有支無自性故隨順無明卽
入生死隨順智慧卽證覺道經言其佛未出家時

有十六子其第一者名曰智積卽十六種識名相
起於阿賴耶阿賴耶卽智積種種珍異玩好之具
卽雜染微細煩惱也經言聞父得成菩提皆捨所
珍往詣佛所者隨順智慧以證覺道也則以同體
之悲哀怜衆生故言諸母涕泣而隨送之又以無
緣慈感攝衆生故言其祖轉輪聖王佛以父喻慈
此言其祖祖則大父蓋無緣之慈卽大慈也又以
四無量心三十七助道品種種法道以隨從之故
槩言一百大臣及餘百千萬億人民皆共圍繞隨
至道場華嚴論曰十住初心便名見道若有餘習
則以如來知見之力而用治之經言十六王子偈

讚佛已勸請說法者淨治餘習之意故有多所安
隱憐愍饒益之辭問曰所示唯識八種名字體相
曉然而起信八種義濫難分願詳爲言之曰五識
爲阿賴耶相分故曰依阿賴耶識說有無明不覺
而起能見能現能取境界此三種識相分說也若
有分別則方屬意收故曰起念相續故說爲意也
又問曰雖明告此意復有五種知不與阿賴耶相
分二種相濫然業識轉識現識與能見能現能取
境界又何異哉曰所以言相分者以未有分別也
若剎那流入意地則分別生分別生則有精粗故
謂之業識者動之至微細者轉識現識皆相次而

形以其行相如此故知不濫前阿賴耶相分三種
也

佛告諸比丘大通智勝佛得阿耨多羅三藐三菩提
時十方各五百萬億諸佛世界六種震動其國中間
幽冥之處日月威光所不能照而皆大明其中衆生
各得相見咸作是言此中云何忽生衆生又其國界
諸天宮殿乃至梵宮六種震動大光普照徧滿世界
勝諸天光爾時東方五百萬億諸國土中梵天宮殿
光明照耀倍於常明諸梵天王各作是念今者宮殿
光明昔所未有以何因緣而現此相是時諸梵天王
卽各相詣共議此事時彼衆中有一大梵天王名救

一切爲諸梵衆而說偈言

我等諸宮殿光明昔未有此是何因緣宜各共求之
爲大德天生爲佛出世間而此大光明徧照於十方
爾時五百萬億國土諸梵天王與宮殿俱各以衣祴
盛諸天華共詣西方推尋是相見大通智勝如來處
于道場菩提樹下坐師子座諸天龍王乾闥婆緊那
羅摩睺羅伽人非人等恭敬圍繞及見十六王子請
佛轉法輪卽時諸梵天王頭面禮佛繞百千匝卽以
天華而散佛上其所散花如須彌山并已供養佛菩
提樹其菩提樹高十由旬華供養已各以宮殿奉上
彼佛而作是言惟見哀憫饒益我等所獻宮殿願垂

納處時諸梵天王卽於佛前一心同聲以偈頌曰
世尊甚希有難可得值遇具無量功德能救護一切
天人之大師哀愍於世間十方諸衆生普皆蒙饒益
我等所從來五百萬億國捨深禪定樂爲供養佛故
我等先世福宮殿甚嚴飾今以奉世尊惟願哀納受
爾時諸梵天王偈讚佛已各作是言惟願世尊轉於
法輪度脫衆生開涅槃道時諸梵天王一心同聲而
說偈言

世雄兩足尊惟願演說法以大慈悲力度苦惱衆生
爾時大通智勝如來默然許之又諸比丘東南方五
百萬億國土諸大梵王各自見宮殿光明照曜昔所

未有歡喜踊躍生希有心卽各相詣共議此事時彼
衆中有一大梵天王名曰大悲爲諸梵衆而說偈言
是事何因緣而現如此相我等諸宮殿光明昔未有
爲大德天生爲佛出世間未曾見此相當共一心求
過千萬億土尋光共推之多是佛出世度脫苦衆生
爾時五百萬億諸梵天王與宮殿俱各以衣祴盛諸
天華共詣西北方推尋是相見大通智勝如來處于
道場菩提樹下坐師子座諸天龍王乾闥婆緊那羅
摩睺羅伽人非人等恭敬圍繞及見十六王子請佛
轉法輪時諸梵天王頭面禮佛繞百千匝卽以天華
而散佛上所散之華如須彌山并以供養佛菩提樹

華供養已各以宮殿奉上彼佛而作是言惟見哀愍
饒益我等所獻宮殿願垂納受爾時諸梵天王卽於
佛前一心同聲以偈頌曰

聖主天中王迦陵頻伽聲哀愍衆生者我等今敬禮
世尊甚希有久遠乃一現一百八十劫空過無有佛
三惡道充滿諸天衆減少今佛出於世爲衆生作眼
世間所歸趣救護於一切爲衆生之父哀愍饒益者
我等宿福慶今得值世尊

爾時諸梵天王偈讚佛已各作是言惟願世尊哀愍
一切轉於法輪度脫衆生時諸梵天王一心同聲而
說偈言

大聖轉法輪顯示諸法相度苦惱衆生令得大歡喜
衆生聞此法得道若生天諸惡道減少忍善者增益
爾時大通智勝如來默然許之又諸比丘南方五百
萬億國土諸大梵王各自見宮殿光明照曜昔所未
有歡喜踊躍生希有心卽各相詣共議此事以何因
緣我等宮殿有此光曜而彼衆中有一大梵天王名
曰妙法爲諸梵衆而說偈言

我等諸宮殿光明甚威曜此非無因緣是相宜求之
過於百千劫未曾見是相爲大德天生爲佛出世間
爾時五百萬億諸梵天王與宮殿俱各以衣祴盛諸
天華共詣北方推尋是相見大通智勝如來處于道

場菩提樹下坐師子座諸天龍王乾闥婆緊那羅摩
睺羅伽人非人等恭敬圍繞及見十六王子請佛轉
法輪時諸梵天王頭面禮佛繞百千匝卽以天華而
散佛上所散之華如須彌山并以供養佛菩提樹華
供養已各以宮殿奉上彼佛而作是言惟見哀愍饒
益我等所獻宮殿願垂納受爾時諸梵天王卽於佛
前一心同聲以偈頌曰

世尊甚難見破諸煩惱者過百三十劫今乃得一見
諸飢渴衆生以法雨充滿昔所未曾睹無量智慧者
如優曇鉢華今日乃值遇我等諸宮殿蒙光故嚴飾
世尊大慈愍惟願垂納受

爾時諸梵天王偈讚佛已各作是言惟願世尊轉于
法輪令一切世間諸天魔梵沙門婆羅門皆獲安隱
而得度脫時諸梵天王一心同聲以偈頌曰

惟願天人尊轉無上法輪擊于大法鼓而吹大法螺
普兩大法雨度無量衆生我等咸歸請當演深遠音
爾時大通智勝如來默然許之西南方乃至下方亦
復如是尔時上方五百萬億國土諸大梵王皆悉自
觀所止宮殿光明威曜昔所未有歡喜踊躍生希有
心卽各相詣共議此事以何因緣我等宮殿有斯光
明時彼衆中有一大梵天王名曰尸棄爲諸梵衆而
說偈言

今以何因緣我等諸宮殿威德光明曜嚴飾未曾有
如是之妙相昔所未聞見爲大德天生爲佛出世間
尔時五百萬億諸梵天王與宮殿俱各以衣祴盛諸
天華共詣下方推尋是相見大通智勝如來處于道
場菩提樹下坐師子座諸天龍王乾闥婆緊那羅摩
睺羅伽人非人等恭敬圍繞及見十六王子請佛轉
法輪時諸梵天王頭面禮佛繞百千匝卽以天華而
散佛上所散之華如須彌山并以供養佛菩提樹華
供養已各以宮殿奉上彼佛而作是言惟見哀愍饒
益我等所獻宮殿願垂納處時諸梵天王卽於佛前
一心同聲以偈頌曰

善哉見諸佛救世之聖尊能於三界獄勉出諸衆生
普智天人尊哀愍群萌類能開甘露門廣度於一切
於昔無量劫空過無有佛世尊未出時十方常暗暝
三惡道增長阿脩羅亦盛諸天衆轉滅死多墮惡道
不從佛聞法常行不善事色力及智慧斯等皆減少
罪業因緣故失樂及樂想住於邪見法不識善儀則
不蒙佛所化常墮於惡道佛爲世間眼久遠時乃出
哀愍諸衆生故現於世間超出成正覺我等甚欣慶
及餘一切衆喜歎未曾有我等諸宮殿蒙光故嚴飾
今以奉世尊惟垂哀納受願以此功德普及於一切
我等與衆生皆共成佛道

爾時五百萬億諸梵天王偈讚佛已各白佛言惟願
世尊轉於法輪多所安隱多所度脫時諸梵天王而
說偈言

世尊轉法輪擊甘露法鼓度苦惱衆生開示涅槃道
惟願受我請以大微妙音哀愍而敷演無量劫習法
論曰化城一品名爲策發二乘疲墮而說其實破
序品如言之執而續未盡之義何以知之無量義
處三昧者諸佛刹那際定也爲此經之宗旨之微
妙無以寄之而寄之於無量義處三昧而已恐學
者機思不妙作如言執故前段示大通智勝佛雖
十劫坐道場而其佛法不得現在前過十小劫乃

得現前耳佛放眉間之光但照東方者密示無量
義處三昧之相如指飢者以甑飢者但見甑而不
見飯故在會之人如彌勒者亦所不知其端而問
文殊蓋佛意不在放光照東方而已恐學者機思
不妙作如言執故此段示自然之光普照十方而
諸梵天推尋此光自十方來隨其所向皆得見佛
而佛無定在之處證成智身不可以三昧處求以
無處所依止故如觀駭雞犀枕面面皆正也凡上
所示皆破如言執也日月燈明佛未出家時有八
王子隨父出家因妙光菩薩教化皆得成佛而其
成佛有速有遲以示八識轉成四智若以知見力

觀六七識則因中所轉成佛之速者也若五八識
則必果中所轉成佛之遲者也然義未盡故今言
大通智勝佛未出家時有十六王子因父成道隨
往供養尋復出家諸母泣送其祖及諸眷屬共詣
親近見其成道蓋增前所示八種識名相爲十六
種以隨順親近之而用無緣大慈同體大悲諸妙
功德長養成熟故十六王子之成佛不言先後也
日月燈明佛之八王子成佛但是妙光文殊然燈
彌勒者但見根身轉依之義未見器界轉依之意
故今以十六王子當成佛道隨方得名以示器界
亦轉依隨方成佛也然根身器界既俱轉依矣五

蘊已成三苦之區十二緣微細行相猶未剖析故
又詳叙三轉四諦十二因緣其文皆在下故凡此
所論皆續未盡之義也

爾時大通智勝如來受十方諸梵天王及十六王子
請卽時三轉十二行法輪若沙門婆羅門若天魔梵
及餘世間所不能轉謂是苦是苦集是苦滅是苦滅
道

論曰三轉者一示相轉二勸修轉三作證轉示相
轉者示其相狀謂是苦乃至是道也勸修轉者勸
其令修謂苦應知乃至道應知也作證轉者引已
證彼謂苦我已知不復更知乃至道我已修不復

更修三轉四諦是爲十二又曰十二行謂令聞法
者發生無漏真聖慧眼於每諦中觀三世爲總又
於每諦中觀過去爲智未來爲明現在爲覺別爲
四諦如是一轉總別四行三轉四諦凡十二行也
輪有摧研之用唯教無行豈能摧惑必須立行方
有輪義故名十二行法輪經言若沙門婆羅門若
天魔梵及餘世間所不能轉者以我所得法轉入
他心令不斷故辟支佛雖自悟而口不能說聲聞
則因佛說而知故沙門所不能轉婆羅門若天魔
梵雖聞其名而不解其義亦所不能轉則餘世間
可知也

及廣說十二因緣法

論曰三轉十二行法輪本爲四諦而言廣說十二因緣法者明此十二因緣卽是細觀四諦法而廣說之也約苦集則有無明緣行乃至生緣老死約道滅則有無明滅無明滅則行滅乃至老死滅也十二通名因緣者本因爲因緣因爲緣因如因丘緣如緣本無明爲本因緣無明之因而爲行行爲本因緣行之因又爲識如是展轉相爲因緣維摩詰曰若知無明畢竟滅故諸行亦畢竟滅乃至生畢竟滅故老死亦畢竟滅則十二因緣者出世之要道辟支佛有自悟者佛當其機而爲之說如維

摩詰所言則菩薩所觀者也

無明緣行行緣識識緣名色名色緣六入六入緣觸觸緣受受緣愛愛緣取取緣有有緣生生緣老死憂悲苦惱無明滅則行滅行滅則識滅識滅則名色滅名色滅則六入滅六入滅則觸滅觸滅則受滅受滅則愛滅愛滅則取滅取滅則有滅有滅則生滅生滅則老死憂悲苦惱滅

論曰華嚴經十地品第六地金剛藏菩薩曰三界

所有唯是一心如來於此分別演說十二有支皆

從一心如是而立何以故隨事貪欲與心共生是

識事是行於行迷惑是無明與無明及心共生是

名色名色增長六處六處三分合爲觸觸共生是
愛愛無厭足是受受攝不捨是取彼諸有支是有
有所起名生生爲老老壞爲死佛子此中無明有
二種業一令衆生迷於所緣二與行作生起因行
亦有二種業一能生未來果報二與識作生起因
識亦有二種業一能令諸有相續二與名色作生
起因名色亦有二種業一互相助成二與六處作
生起因六處亦有二種業一各自取境界二與觸
作生起因觸亦有二種業一能爲觸所緣二與受
作生起因受亦有二種業一能領受愛憎等事二
與愛作生起因愛亦有二種業一深著所愛事二

與取作生起因取亦有二種業一令諸煩惱相續
二與有作生起因有亦有二種業一能令於餘趣
中生二與生作生起因生亦有二種業一能起諸
蘊二與老作生起因老亦有二種業一諸根變異
二與死作生起因死亦有二種業一能壞諸行二
與不覺知故相續不絕自是觀之則十二有支相
因而成無有作用無有體性但如磁石鐵不謀而
合磁石豈有知思哉而注發動轉若有使之者故
涅槃經曰磁石不曾吸鐵鐵亦不吸磁石而磁石
與鐵見必相合無明不吸諸行諸行不吸識心亦
得名爲無明緣行識等故經言無明滅則行滅乃

至老死憂悲苦惱滅者如此

佛於天人大衆之中說是法時六百萬億那由他人以不受一切法故而於諸漏心得解脫皆得深妙禪定三明六通具八解脫第二第三第四說法時千萬億恒河沙那由他等衆生亦以不受一切法故而於諸漏心得解脫從是已後諸聲聞衆無量無邊不可稱數爾時十六王子皆以童子出家而爲沙彌諸根通利智慧明了已曾供養百千萬億諸佛淨修梵行求阿耨多羅三藐三菩提俱白佛言世尊是諸無量千萬億大德聲聞皆已成就世尊亦當爲我等說阿耨多羅三藐三菩提法我等聞已皆共修學世尊我

等志願如來知見深心所念佛自證知爾時轉輪聖王所將衆中八萬億人見十六王子出家亦求出家王卽聽許爾時彼佛受沙彌請過二萬劫已乃於四衆之中說是大乘經名妙法蓮華教菩薩法佛所護念說是經已十六沙彌爲阿耨多羅三藐三菩提故皆共受持諷誦通利說是經時十六菩薩沙彌皆悉信受聲聞衆中亦有信解其餘衆生千萬億種皆生疑惑佛說是經於八千劫未曾體廢說此經已卽入靜室住於禪定八萬四千劫是時十六菩薩沙彌知佛入室寂然禪定各昇法座亦於八萬四千劫爲四部衆廣說分別妙法華經一一皆度六百萬億那由

他恒河沙等衆生示教利喜令發阿耨多羅三藐三
菩提心大通智勝佛過八萬四千劫已從三昧起往
詣法座安詳而坐普告大衆是十六菩薩沙彌甚爲
希有諸根通利智慧明了已曾供養無量千萬億數
諸佛於諸佛所常修梵行受持佛智開示衆生令入
其中汝等皆當數數親近而供養之所以者何若聲
聞辟支佛及諸菩薩能信是十六菩薩所說經法受
持不毀者是人皆當得阿耨多羅三藐三菩提如來
之慧佛告諸比丘是十六菩薩常樂說是妙法蓮華
經一一菩薩所化六百萬億那由他恒河沙等衆生
世世所生與菩薩俱從其聞法悉皆信解以此因緣

行值四萬億諸佛世尊于今不盡

論曰大通智勝佛受十六王子勸請說法過二萬
劫乃說此經經八千劫未曾休廢則經之句偈以
阿僧祇阿難陀海亦不能記持以阿僧祇迦旃延
辯亦不能演說唯自證者神而明之若欲深入三
昧求之雖大通智勝佛安坐經八萬四千劫終莫
能睹若欲盡其辯慧傳之雖十六王子樂說經八
萬四千劫終莫能授蓋安坐三昧不過乎默樂說
辯慧不過乎語夫自證有思慮所不能及語默豈
能形容哉然十六王子始稱王子漸次出家則稱
沙彌勤苦得道乃稱菩薩者示此經必須自成熟

而悟非可以三昧求語言傳也

諸比丘我今語汝彼佛第十六沙彌今皆得阿耨多羅三藐三菩提於是十方國土現在說法有無量百千萬億菩薩聲聞以爲眷屬其二沙彌東方作佛一名阿閼在歡喜國二名須彌頂東南方二佛一名師子音二名師子相南方二佛一名虛空住二名常滅西南方二佛一名帝相二名梵相西方二佛一名阿彌陀二名度一切世間苦惱西北方二佛一名多摩羅跋栴檀香神通二名須彌相北方一佛一名雲自在二名雲自在王東北方佛名壞一切世間怖畏第十六我釋迦牟尼佛於娑婆國土成阿耨多羅三

發三菩提

論曰萬物出乎震震東方也二佛一名阿閼在歡喜國二名須彌頂震動也動而怖懼也阿閼此言無動而在歡喜國者也須彌頂則又無動之極也齊乎巽巽東南方也巽爲進退爲不果則不能無所畏者也二佛一名師子音則其音無畏者也二名師子相則其相無所畏者也相見乎離離南方之卦也萬物皆相見則其相於此辨也二佛一名虛空住二名常滅虛空住則於相無相也常滅則從本已來常寂滅也致役乎坤坤西南方也坤也者地也萬物皆致養也二佛一名帝相則雖差別

假名無非帝相也二名梵相則雖藏疾納汙無非
梵相也說言乎允允西方也以出乎震反之則萬
物之所入也二佛一名阿彌陀二名度世間苦惱
阿彌陀此言無量壽則不見其有出入相而度世
間一切無常之苦惱也戰乎乾乾西北方之卦也
二佛一名多摩羅跋耨檀香神通二名須彌相多
摩羅跋此言無垢賢香則不與萬物戰者也神通
則非萬物之所敵也須彌相則毀譽不動而其相
之可見也勞乎坎坎水也北方之卦也萬物之所
歸也二佛一名雲自在二名雲自在王雲自在則
不滯於水者也雲自在王則又自在之至也成言

乎良良東北方也萬物之所成終而成始也原始
反終故知死生之說而壞世間之所怖畏也佛名
壞世間怖畏則不見其有生死怖畏也第十六我
釋迦牟尼佛於娑婆國土成阿耨多羅三藐三菩
提釋迦牟尼此言能仁寂默娑婆此言堪忍唯能
仁寂默所以於萬物終始之際不厭生死不住涅
槃而於忍土成無上正徧正覺救諸苦趣衆生也
問曰佛於耆闍崛山說此經計支那國易書未具
也而以此方之易卦釋中印秘言乃不自疑乎曰
一切法分四重無礙一曰理無礙二曰事無礙三
曰理事無礙四曰事事無礙若以中印支那語言

爲不可交相釋則事事爲礙也安能達一切法乎
華嚴論曰閻浮東北艮位也文殊師利童子游行
居止之所以明啓蒙之首故名童子菩薩其實爲
十方諸佛無性妙慧成佛必由之門衆生皆具而
以迷理自惑不見欲見者現行分別是也以定慧
照之卽明故艮爲止也又曰南無佛隨者南方离
卦离虛其中自心之象也南無此言救我而論釋
以理方隅定位而論婉以法是真達事事無礙之
旨者也

諸比丘我等爲沙彌時各各教化無量百千萬億恒
河沙等衆生從我聞法爲阿耨多羅三藐三菩提此
諸衆生于今有住聲聞地者我常教化阿耨多羅三
藐三菩提是諸人等應以是法漸入佛道所以者何
如來智慧難信難解爾時所化無量恒河沙等衆生
者汝等諸比丘及我滅度後未來世中聲聞弟子是
也我滅度後復有弟子不聞是經不知不覺菩薩所
行自於所得功德生滅度想當入涅槃我於餘國作
佛更有異名是人雖生滅度之想入於涅槃而於彼
土求佛智慧得聞是經唯以佛乘而得滅度更無餘
乘除諸如來方便說法諸比丘若如來自知涅槃時
到衆又清淨信解堅固了達空法深入禪定便集諸
菩薩及聲聞衆爲說是經世間無有二乘而得滅度

唯一佛乘得滅度耳比丘當知如來方便深入衆生之性知其志樂小法深著五欲爲是等故說於涅槃是人若聞則便信受譬如五百由旬險難惡道曠絕無人怖畏之處若有多衆欲過此道至珍寶處有一導師聰慧明達善知險道通塞之相將導衆人欲過此難所將人衆中路懈怠白導師言我等疲極而復怖畏不能復進前路猶遠今欲退還導師多諸方便而作是念此等可慙云何捨大珍寶而欲退還作是念已以方便力於險道中過三百由旬化作一城告衆人言汝等勿怖莫得退還今此大城可於中止隨意所作若入是城快得安隱若能前至寶所亦可得

去是時疲極之衆心大歡喜歎未曾有我等今者免斯惡道快得安隱於是衆人前入化城生已度想生安隱想亦時導師知此人衆既得止息無復疲倦卽滅化城語衆人言汝等去來寶處在近向者大城我所化作爲止息耳諸比丘如來亦復如是今爲汝等作大導師知諸生死煩惱惡道險難長遠應去應度若衆生但聞一佛乘者則不欲見佛不欲親近便作是念佛道長遠久受勤苦乃可得成佛知是心怯弱下劣以方便力而於中道爲止息故說二涅槃若衆生住於二地如來爾時卽便爲說汝等所作未辦汝所住地近於佛慧當觀察籌量所得涅槃非真實也

但是如來方便之力於一佛乘分別說三如彼導師
爲止息故化作大城旣知息已而告之言寶處在近
此城非實我化作耳尔時世尊欲重宣此義而說偈
言

大通智勝佛十劫坐道場佛法不現前不得成佛道
諸天神龍王阿脩羅衆等常雨於天華以供養彼佛
諸天擊天鼓并作衆技樂香風吹萎華更雨新好者
過十小劫已乃得成佛道諸天及世人心皆懷踊躍
彼佛十六子皆與其眷屬千萬億圍繞俱行至佛所
頭面禮佛足而請轉法輪聖師子法雨充我及一切
世尊甚難值久遠時一現爲覺悟羣生震動於一切

東方諸世界五百萬億國梵宮殿光曜昔所未曾有
諸梵見此相尋來至佛所散華以供養并奉上宮殿
請佛轉法輪以偈而讚歎佛知時未至受請默然坐
三方及四維上下亦復尠散華奉宮殿請佛轉法輪
世尊甚難值願以本慈悲廣開甘露門轉無上法輪
無量慧世尊受彼衆人請爲宣種種法四諦十二緣
無明至老死皆從生緣有如是衆過患汝等應當知
宣暢是法時六百萬億姪得盡諸苦際皆成阿羅漢
第二說法時千萬恒沙衆於諸法不受亦得阿羅漢
從是後得道其數無有量萬億劫算數不能得其邊
時十六王子出家作沙弥皆共請彼佛演說大乘法

我等及營從皆當成佛道願得如世尊慧眼第一淨
佛知童子心宿世之所行以無量因緣種種諸譬喻
說六波羅蜜及諸神通事分別真實法菩薩所行道
說是法華經如恒河沙偈彼佛說經已靜室入禪定
一心一處坐八萬四千劫是諸沙彌等知佛禪未出
爲無量億衆說佛無上慧各各坐法座說是大乘經
於佛宴寂後宣揚助法化一一沙弥等所度諸衆生
有六百萬億恒河沙等衆彼佛滅度後是諸聞法者
在在諸佛土常與師俱生是十六沙彌具足行佛道
今現在十方各得成正覺今時聞法者各在諸佛所
其有住聲聞漸教以佛道我在十六數曾亦爲汝說

是故以方便引汝趣佛慧以是本因緣今說法華經
令汝入佛道慎勿懷驚懼譬如險惡道迥絕多毒獸
又復無水草人所怖畏處無數千萬衆欲過此險道
其路甚曠遠經五百由旬時有一導師強識有智慧
明了心決定在險濟衆難衆人皆疲倦而白導師言
我等今頓乏於此欲退還導師作是念此輩甚可愍
如何欲退還而失大珍寶尋時思方便當設神通力
化作大城郭莊嚴諸舍宅周而有園林渠流及浴池
重門高樓閣男女皆充滿卽作是化已慰衆言勿懼
汝等入此城各可隨所樂諸人旣入城心皆大歡喜
皆生安隱想自謂已得度導師知息已集衆而告言

汝等當前進此是化城耳我見汝疲極中路欲退還故以方便力權化作此城汝今勤精進當共至寶所我亦復如是爲一切導師見諸求道者中路而懈廢不能度生死煩惱諸險道故以方便力爲息說涅槃言汝等苦滅所作皆已辦既知到涅槃皆得阿羅漢爾乃集大衆爲說真實法諸佛方便力分別說三乘唯有一佛乘息處故說二今爲汝說實汝所得非滅爲佛一切智當發大精進汝證一切智十力等佛法具三十二相乃是真實滅諸佛之導師爲息說涅槃既知是息已引入於佛慧

論曰如前偈曰若人散亂心入於塔廟中一稱南

無佛皆已成佛道但一稱佛之名則佛道已成何其易哉今此偈曰大通智勝佛十劫坐道場佛法不現前不得成佛道經十劫而坐猶不成道又何其難也豈一經首尾自相違戾耶經必有旨耶曰一佛乘唯論知見唯以佛之知見開悟衆生故鄙陋功力取證也華嚴經曰如來常愍會中一切諸大菩薩求覓普賢不見其身及座者以功力取證者也又曰令各生想念殷勤三禮普賢菩薩方以神通力如應現化者以知見之力了達者也蓋智身不可以三昧處求爲智體無住無所依止故若生想念願樂卽如應現化無有處所依止故猶如

谷響但有應物之音若呼之卽應無有處所可得
經言寶所在近不言方所者以此也金剛般若經
曰應無所住而生其心若心有住卽爲非住釋者
曰若住善法卽是善法成就若住惡法卽是惡法
成就善惡之法旣各成就則真心自應隱沒若不
住一切處則真心顯露故經過險道止息化城之
衆方於自心之外妄見息滅之境作滅度想其可
以語寶所在近之旨哉問曰論稱化城一品雖名
策發二乘疲墮而說其實破序品如言執續未盡
之義然何意特於授記品之後說之耶曰一佛乘
之宗建於序品故眉間之光密示此宗無量義處

三昧顯說此宗夫密示顯說之意旣已傳然神穎
妙契者不可以人人求之故又方便譬喻說之旣
已信解授記則是一大事因緣出現於世者畢矣
而破如言之執續未盡之義次於其後固其所也
尚何疑哉

無盡居士論曰聲聞大弟子旣授記於未來成佛
然過去現在佛以何爲證佛卽爲說過去無量無
邊不可思議阿僧祇劫有佛名大通智勝我以如
來知見力故觀彼久遠猶若今日偈言曰大通智
勝佛十劫坐道場佛法不現前不得成佛道何也
十六王子十方梵天請轉法輪佛雖許之而說時

未至故佛法不現前也初轉法輪宣說四諦十
因緣度六百萬億衆阿羅漢而已再轉法輪千萬
恒沙衆於諸法不受亦得阿羅漢而已至十六王
子出家作沙彌請佛爲我等說阿耨多羅三藐三
菩提受請過二萬劫已乃說大乘經名妙法蓮華
經如恒河沙偈佛法現前則向之十六沙彌今謂
之十六菩薩已六祖曰前念後念及今念念不
被愚迷染苟非弟子與師宿世因緣正念常住未
嘗生滅則何以植德本於沙界種善根於曩劫猶
如今日也且釋迦文佛自大通智勝佛時出家教
化至此而後聲聞授記何其悠久也蓋人之貪著


未易遣拂厭苦則欣慕欣慕則著小法佛以是故
說化城採寶之喻先以二乘涅槃息其疲懈而終
示之以佛寶也然則四諦十二因緣者化城也息
於化城而得佛寶故偈曰是十六王子皆得成佛
道法不妄起數不虛設通此則通彼知喻則知實
矣

妙法蓮華經合論卷第三

釋義

輜音縑斷去聲揣楚委切魯音魯畜凶入聲禱音愈稽音愈
音屑數上聲語去聲





女

三